

Buur ya

di téere bu jëkk bi

Le premier livre des Rois en wolof

traduit de l'hébreu et publié par
la Mission Baptiste du Sénégal

B.P. 8408, 14523 Dakar

B.P. 1229, 23022 Thiès

Traduction provisoire

Droit de reproduction © 2013 Mission Baptiste du Sénégal

Tous droits réservés.

Quiconque voudrait le reproduire devra inclure la déclaration de droit d'auteur ci-dessus.

Pour la reproduction en plus de 250 exemplaires, veuillez écrire à l'adresse suivante:

B.P. 1229 — Thiès, Sénégal

Ku ko bégga sotti, na ci boole kàdduy sañ-sañu boroom yii:

"© 2013 Mission Baptiste du Sénégal."

Ku ko bégga sotti lu ëpp 250 yoon, na bind ci :

B.P. 1229 — Thiès, Sénégal

Pour mieux lire ce livre...

L'alphabet officiel dont on se sert est facile à lire. Les seuls symboles qui présentent une certaine difficulté sont les suivants:

j	se trouve dans	la paix	--jàmm (ji)
	et	dernier	--muuj
c	se trouve dans	le couscous	--cere (ji)
	et	descendre	--wàcc
ñ	se trouve dans	tous	--ñépp
	et	refuser	--bañ
x	se trouve dans	savoir	--xam
	et	la main	--loxo (bi)
ë	se trouve dans	l'œil	--bèt (bi)
	et	demain	--ëllëg
ŋ	se trouve dans	la mâchoire	--ŋaam (wi)
	et	seulement	--doŋŋ

Une différence existe entre **a** et **à**

baigner	--sang	revêtir	--sàng
l'encensoir	--and (bi)	accompagner	--ànd

La voyelle est **doublée** pour indiquer la longueur

valoir	--jar	passer par	--jaar
être propre	--set	chercher	--seet
le cœur	--xol (bi)	regarder	--xool
le nom	--tur (wi)	répandre	--tuur

La voyelle est **accentuée** pour indiquer la fermeture

souper	--reer	être perdu	--réer
jeûner	--woor	être sûr	--wóor

Li nuy bëgga lim lu nu tëral la, bëgg cee déggook bokki jàngkat yu tedd yi,
ngir déggin wi leer, ba deesu ko jaawatle.

Nanu ràññee...

nanu ak nañu

Dees na wax: «(Nun) war nañoo dem» (**n** bi am maas bii: ~).

Waaye danu koo taamoo binde nii:

«(Nun) war **nanoo** dem,»

ngir ñu bañ koo jaawatleek: «War nañoo dem (ñoom).»

naa ak na

Bu loolu weesoo, dees na wax: «(Moom) war naa dem.»

Waaye danu koo taamoo binde nii:

«(Moom) war **na** dem,»

ngir ñu bañ koo jaawatleek: «War **naa** dem (man).»

leen ak léen

Te it dees na wax, «Bëgg nanu leen (ñoom).»

Waaye danu koo taamoo binde nii:

«Bëgg nanu **léen** (ñoom),» (**léen** am maas bii: ´)

ngir ñu bañ koo jaawatleek: «Bëgg nanu **leen** (yéen).»

Noonu:

Yéen ñi gëm, Yàlla musal na **leen**.

Ñoom ñi gemul, Yàlla rëbb na **léen**.

Boo gisee màndarga mii — , xamal ne kàddu gee yeggul. Dafa dog, mbaa
muy wax ju ñu junj rekk.

Mbind yi ñu ràññale ak yi ñu dijjal, boddul ci mbindum Yàlla mu sell, mi
ñu jukkee ci téere yu jëkk ya.

Boo gisee baat bu ñu tofal araf bu tuuti bu mel nii a, seetal lu muy
tekki ci suufu xët mi.

Boo gisee tomb bii ° ci boppu baat, seetal lu muy tekki ci *Leeral yi*, fi téere
biy waaja jeexe.

Buur ya

di téere bu jëkk bi

Lu jëm ci nguurug Suleymaan (Saar 1.1---11.43)

Daawuda néew na doole

1 ¹ Gannaaw gi Buur Daawuda mujj na màggat, ba làq at yu bare, ñu di ko sàng ay sér te du ko taxa tàng. ² Ay dagam ne ko: «Buur, sang bi, nañu la wutal ab janq, mu di la taxawu, di la topptoo. Man na tëdd it ci sa wet, Buur, ndax nga liwwi, sang bi.» ³ Noonu ñu seet ci tundu Israyil wépp, ba gis janq bu rafet bu ñuy wax Abisag, di waa Sunem. Ñu indil ko Buur. ⁴ Janq baa nga taaru lool. Muy topptoo nag Buur, di ko taxawu, waaye Buur dëkkoowu ko.

Adoña ngi sàkku jal bi

⁵ Ci biir loolu Adoña doomu Daawudaak Agit, di tëggu naan: «Man mii maay doon buur.» Mu waajalal boppam watiiru xare ak i fas ak juróom fukki nit ñuy daw di ko jiitu. ⁶ Baayam Daawuda nag masu koo wax dara, ak lu mu mana def. Adoña moo toppoon ci Absalom. Mu doonoon ku góorayiw lool.

⁷ Ci kaw loolu Adoña diisook Yowab, mi Seruya di ndeyam, ak Abiyatar °sarxalkat ba, ñooñu jàpple ko. ⁸ Waaye Sadog sarxalkat ba ak Benaya doomu Yoyada, ak yonent Yàlla Natan, ak Simeyi ak Reyi, ñook jàmbaraari Daawuda ya koy dar, ñooñu ànduñu woon ak Adoña. ⁹ Ba mu ko defee Adoña sarxe ay xar ak i nag ak i wëllu yu duuf ca wetu doju Soyelet, fa feggook En Rogel. Mu woo ca mboolem doomi Buur yu góor ya mu bokkal baay, ak jawriñi Buur yu diiwaanu Yuda. ¹⁰ Waaye woowul yonent Yàlla Natan ak Benaya, woowul jàmbaar yay dar Daawuda, woowul rakkam Suleymaan.

¹¹ Ba loolu amee Natan laaj Batseba, ndeyu Suleymaan, ne ko: «Waaw, xanaa déggoo ne Adoña doomu Agit falu na buur te sunu sang Daawuda yégu ko? ¹² Kaay gaaw, ma digal la nooy def, ba musal sa bakkan ak sa bakkanu doom Suleymaan. ¹³ Gaawal dem ca Buur Daawuda, ne ko: “Buur, sang bi, du

yaa ma giñaloon, yaw sang bi, ne ma sama doom Suleymaan mooy falu buur, wuutu la, te mooy toog ci sa jal bi? Kon nag lu tax Adoña falu buur?” ¹⁴ Gisal, diir bi ngay wax ak Buur foofa, man dinaa duggsi, topp ci yaw te dinaa dëggal sa kàddu.»

¹⁵ Batseba dem ba ca Buur, ca biir néegam. Buur a nga màggat lool, Abisag mu Sunem di ko taxawu. ¹⁶ Batseba agsi sujjóotal Buur, sukk fi kanamam. Buur ne ko: «Lu doon say tànk?» ¹⁷ Mu ne ko: «Sama sang, yaw yaa ma giñal ci sa Yàlla Aji Sax ji, sang bi, nga ne ma sama doom Suleymaan de dina falu buur moos, wuutu la, te moom mooy toog ci sa kaw jal bi. ¹⁸ Waaye xoolal léegi Adoña ngii falu buur, te yaw Buur sang bi, yéguloo ko. ¹⁹ Sarxe na ay nag ak wëllu yu duuf ak xar yu bare. Woo na ca doomi Buur yu góor yépp, woo ca Abiyatar sarxalkat ba, woo ca Yowab, njiitu mbooloom xare mi. Waaye Suleymaan sa surga ba, woowu ko. ²⁰ Yaw nag Buur, sang bi, Israyil gépp a ngi ne jàkk ci yaw, ngir nga xamal léen kan ngay dëj ci sab jal, mu wuutu la, sang bi. ²¹ Lu ko moy de Buur, sang bi, bés boo noppalujee fekki say maam, su boobaa man, maak sama doom Suleymaan dinañu nu tuumaal.»

²² Na Batseba di wax ak Buur, yonent Yàlla Natan jekki ne jalañ. ²³ Ñu wax ko ne ko: «Buur, yonent Yàlla Natan a ngoog.» Mu agsi ba ci kanam Buur, sujjóotal ko, dëpp kanamam fa suuf. ²⁴ Natan ne ko: «Buur, sang bi, ndax yaa wax ne Adoña mooy falu buur, wuutu la, te moom mooy toog ci kaw jal bi? ²⁵ Ndax kat, Adoña dem na tey jii, sarxeji lu bare ciy nag ak wëllu yu duuf ak i xar. Woo na ca doomi Buur yu góor yépp, ñook njiiti xare yeek Abiyatar sarxalkat bi. Ña nga noonee di lekk ak a naan ñook moom te naa: “Buur Adoña, guddal u fan!” ²⁶ Man sa surga bii nag, maak Sadog sarxalkat bi ak Benaya doomu Yoyada ak sa surga ba Suleymaan, woowu nu ca. ²⁷ Buur, sang bi, ndax wér na ne loolu ndigal la lu bàyyikoo fi yaw, te xamaloo nu kan mooy toog ci sa kaw jal bi, wuutu la, yaw Buur, sang bi?»

²⁸ Buur Daawuda ne ko: «Wool ma Batseba!» Noonu Batseba dikk taxaw fa kanam Buur. ²⁹ Buur daldi giñ ne: «Giñ naa ci Aji Sax ji, kiy dund te musal sama bakkan bii ci gépp njàqare, ³⁰ bir na ne loolu ma la giñaloon ci Aji Sax

ji, Yàllay Israyil, ne la bir na ne Suleymaan sa doom mooy doon buur wuutu ma te mooy toog ci kaw jal bii ma toog-- loolu déy dinaa ko sotal bés niki tey.»³¹ Ba mu ko defee Batseba dëpp kanamam fa suuf, sukk fa kanam Buur, ne ko: «Buur Daawuda, sang bi, yal nanga fi yàgg.»

Suleymaan falu na

³² Buur Daawuda daldi ne: «Wool-leen ma Sadog °sarxalkat bi, ak yonent Yàlla Natan ak Benaya doomu Yoyada.» Ba ñu dikkee fa kanam Buur,³³ Buur ne léen: «Àndleen ak samay dag, ngeen waral sama doom Suleymaan ca sama kaw berkelle bu jigéen ba, te yóbbu ko Giyon, bētu ndox ba. ³⁴ Sadog sarxalkat bi ak yonent Yàlla Natan, nañu ko °diw foofa, fal ko mu jiite Israyil. Su ko defee ngeen wal liit gi te yéene ne: “Buur Suleymaan, guddal u fan!”³⁵ Noonu ngeen topp ci moom, délsi, mu dikk toog ci kaw jal bi. Moom mooy nguuru, wuutu ma. Moom laa fal, mu yilif Israyil ak Yuda.»³⁶ Ba loolu amee Benaya doomu Yoyada ne Buur: «Buur, sang bi, yal na ko Aji Sax ji sa Yàlla dogal. Amiin!³⁷ Na Aji Sax ji ànde woon ak yaw Buur, sang bi, yal na ni àndeek Suleymaan, te yal na kaweel ab jalam, ba mu sut sab jal, yaw Buur Daawuda, sang bi.»³⁸ Gannaaw loolu Sadog sarxalkat ba daldi ànd ak yonent Yàlla Natan ak Benaya doomu Yoyada, ak waa Keret ak waa Pelet yay dar Daawuda. Ñu waral Suleymaan berkelleb Buur Daawuda. Ñu dar ko ba Giyon, bētu ndox ba. ³⁹ Ci kaw loolu Sadog sarxalkat ba dem ca xaymab Aji Sax ji, jële fa béjjén ba def diwu pal ga, diw ca Suleymaan. Ñu wal liit ga, mbooloo ma mépp àddu ca kaw ne: «Buur Suleymaan, guddal u fan!»⁴⁰ Ba loolu amee mbooloo ma mépp topp ca, bég lool, di toxoro, coow la jolli, ba suuf sa di riir.

⁴¹ Ba mu ko defee Adoña dégg ca, mook mboolem ña mu woo woon, ñu nekk faak moom. Fekk ñu lekk ba noppi. Ba Yowab dégge liit ga, da ne: «Waaw, riir mi ci dëkk bi, lu mu doon?»⁴² Daaneelagul kàddoom sax, Yonatan doomu Abiyatar sarxalkat ba ne jaas, agsi. Adoña ne ko: «Dikkal, yaw nit ku baax nga, te xibaaru jàmm ngay indi.»⁴³ Yonatan ne Adoña:

«Déedéet kay, sunu sang Buur Daawuda fal na Suleymaan buur. ⁴⁴ Buur boole na kook Sadog sarxalkat bi ak yonent Yàlla Natan ak Benaya doomu Yoyada ak waa Keret ak waa Pelet yay dar Buur. Yebal na léen, ñu waral ko berkelleb Buur. ⁴⁵ Sadog sarxalkat baak yonent Yàlla Natan diw nañu ko, fal ko ca Giyon, ba bàyyikoo ca, di ko bége, mu dim riir ci dëkk bi. Mooy coow, li ngeen dégg. ⁴⁶ Suleymaan sax toog na ca jalu buur; ⁴⁷ te it jawriñi Buur ñëw nañu, di sargalsi sunu sang Buur Daawuda, ne ko: “Yal na sa Yàlla siiwal turu Suleymaan, ba mu gën laa am u tur. Yal na kaweel ab jalam, ba mu gëna kawé sab jal.” Buur sujjóot ca kaw lalam, ⁴⁸ teg ca ne: “Cant ñeel na Aji Sax ji, Yàllay Israyil, ji ma jox bésub tey ku ma wutu ci samab jal, may gis.”» ⁴⁹ Noonu tiitaange jàpp mboolem ña ñu woo woon ca jataayu Adoña. Ñu jóg, tasaaroo, ku nekk dem yoonam.

⁵⁰ Adoña nag ragal Suleymaan, daldi dem jàpp ca béjjén ya ca cati °sarxalukaay ba, ngir rawale bakkanam.^a ⁵¹ Ñu wax ko Suleymaan, ne ko: «Buur Suleymaan, Adoña de, ragal na la. Deful lu moy jàpp ca béjjéni sarxalukaay ba te naa: “Na ma Buur Suleymaan sang bi giñal tey jii ne du ma jam saamar, ma dee.”» ⁵² Suleymaan daldi ne: «Su dee nit ku jara wóolu de, genn kawaram du wadd ci suuf. Waaye su lalee pexem wor de, dina dee.» ⁵³ Ba loolu amee Buur Suleymaan yónnee, ñu jëleji Adoña ca sarxalukaay ba, mu dikk, sujjóotal Buur Suleymaan. Mu ne ko: «Man ngaa ñibbi sa kër.»

Daawuda dénkú na Suleymaan

2 ¹ Ba ñu demee ba bésu àppu Daawuda di jegesi, Daawuda dafa dénk doomam Suleymaan, ne ko: ² «Maa ngi ci yoon wu dul jaas ci mboolem àddina. Nanga dëgërлу te góor-góorлу, ³ di sàmm sa ndénkaaney Yàlla Aji Sax ji, di topp ay yoonam, sàmmontee ay dogali yoonam ak i santaaneem ak i àttey yoonam ak i seedeem, ni ñu ko binde ci yoonu Musaa. Su ko defee dinga am ndam ci lépp loo def ak fépp foo jëm, ⁴ ba keroog Aji Sax ji sottal

^a 1.50 Jàpp ca sarxalukaay ba ca kër Yàlla ga, nit daan na ko def, di ko sàkkoo rawale bakkanam. Seetal ci Mucc ga 21.14.

kàddoom ga mu ma waxoon ne ma: “Su say sèt sàmme seen dundin, saxoo ngëm gu ma wéetal, te gar ci seen bakkan, kon doo ñàkk mukku ku lay wuutu ci jalub Israyil.”

⁵ «Yaw ci sa bopp xam nga li ma Yowab doomu ndaw sa Seruya def, te def na ko ñaari njiiti xarey Israyil, di Abner doomu Ner ak Amasa doomu Yeter: rey na léen, tuur seen deret ni bu doon xare, ba taqal boppam ripp. Moo rendi ci biir jamonoy jàmm. ⁶ Jëflanteel ak moom ci kaw xel, bu ko bàyyi mu duggaale bàmmeel bijjaaw.

⁷ «Góor ñiy doomi Barsilay mu Galàdd nag, nanga léen baaxe, te ñuy bokk ak yaw ndab, ndax kat taxawu woon nañu ma, ba may daw Absalom sa doomu baay.

⁸ «Gannaaw loolu bàyyil xel ci Simeyi mi nga feggool, di doomu Gera mu Baxurim, mi bokk ci giiru Beñamin. Moom moo ma doon tifaar i saaga, bés ba ma jëmee Maxanayim, moom mu dikk dajeek man ca dexu Yurdan. Ma giñal ko ci Aji Sax ji ne ko: “Duma la rey, sama saamar du la dal!” ⁹ Waaye yaw de, bu ko ñàkka topp, ndax boroom xel nga, te dinga xam ni ngay defeek moom, ba mu sangoo deretam, ànd ak bijjaawam, dugg bàmmeel.»

¹⁰ Gannaaw loolu Daawuda nelaw, fekki ay maamam, ñu denc ko ca gox ba ñu naan Kër Daawuda. ¹¹ Nguuru Daawuda ci Israyil toll na ci ñeent fukki at, di juróom ñaari at ya mu péeyoo Ebron, ak fanweeri at ak ñett ya mu péeyoo Yerusalem.

¹² Suleymaan nag toog ca jalub baayam Daawuda; nguuram dëgër, ne kekk.

Nii la Adoña mujje

¹³ Ci biir loolu Adoña ma Agit di ndeyam, dem ca Batseba, ndeyu Suleymaan. Mu ne ko: «Mbaa jàmm a la indi?» Mu ne ko: «Jàmm la.» ¹⁴ Mu neeti ko: «Mbir la mu ma lay wax.» Mu ne ko: «Waxal.» ¹⁵ Mu ne ko: «Xam nga ne maa moomoon nguur gi, te man la Israyil gépp séentu woon, ma falu buur. Waaye tey nguur gi walbatiku na, tegu ci sama loxol doomu baay, ndax Aji Sax jee ko ko jox. ¹⁶ Léegi nag lenn rekk laa lay ñaan, te nga bañ maa

gàntu.» Mu ne ko: «Waxal rekk.» ¹⁷ Mu ne ko: «Buur Suleymaan du la gantu, rikk ñaanal ma ko, mu may ma Abisag mu Sunem soxna.» ¹⁸ Batseba ne ko: «Baax na, man kay maa la koy waxal Buur.» ¹⁹ Batseba dem ca Buur Suleymaan, ngir wax ko mbirum Adoña ma. Buur jóg gatandu ko, sukkal ko, daldi toogaat ci ngànguneem. Mu tegal ndeyam ngàngune, mu toog ci ndijooram. ²⁰ Mu ne ko: «Man de, lenn lu tuut rekk laa lay ñaan, te bu ma gantu.» Mu ne ko: «Waxal, saa ndey, дума la gantu.» ²¹ Mu ne ko: «Abisag mu Sunem, may ko sa doomu baay Adoña soxna.» ²² Buur Suleymaan ne ndeyam: «Nga ne! Adoña ngay ñaanal Abisag mu Sunem soxna? Tee nga koo ñaanal nguur gi far, nde mooy sama mag, ñaanalaale ko Abiyatar °sarxalkat bi, mook Yowab doomu Seruya?»

²³ Buur Suleymaan nag giñ ci Aji Sax ji ne: «Yal na ma Yàlla teg mbugal mu gëna tar, ndegam Adoña du feye bakkanam lii muy sàkku! ²⁴ Léegi nag giñ naa ci Aji Sax ji, kiy dund, te teg ma fi, dëj ma ci jalub Daawuda sama baay, sampal ma askanu nguur, wa mu dige woon, bésub tey jii Adoña dina dee.» ²⁵ Noonu Buur Suleymaan jox ndigal Benaya doomu Yoyada. Benaya jam Adoña, mu dee.

Nii la Abiyatar mujje

²⁶ Abiyatar °sarxalkat bi nag, Buur ne ko: «Dellul Anatot ca say tool. Dee rekk a war ci yaw, waaye bésub tey jii дума la rey, ndax li nga gaddu woon °gaalu Aji Sax ji, Boroom bi, dox jiitu sama baay Daawuda. Nga teg ci bokk ak sama baay mboolem coono bu mu daj.» ²⁷ Suleymaan nag jële Abiyatar ci liggéeyu saraxi Aji Sax ji, daldi matal li Aji Sax ji waxoon ci waa kër Eli ca Silo.

Nii la Yowab mujje

²⁸ Yowab àndul woon ak Absalom ci pexeem, waaye Adoña la mujj àndal. Ba Yowab yégee la xew, daa daw ba ca xaymab Aji Sax ji, jàpp ca béjjén ya ca cati °sarxalukaay ba, ngir rawale bakkanam. ²⁹ Ñu wax Buur Suleymaan ne

ko: «Yowab daw na, làquji ca xaymab Aji Sax ji, te kat ma nga ca sarxalukaay ba.» Suleymaan sant Benaya doomu Yoyada, ne ko mu dem, jam ko. ³⁰ Benaya dugg ca biir xaymab Aji Sax ja, ne ko: «Buur nee na nga génn!» Yowab ne ko: «Génnuma, fii laay deeye!» Benaya yegge Buur waxi Yowab ak la mu ko tontu. ³¹ Buur ne ko: «Defal li mu wax, jam ko mu dee, nga suul ko, ndax ma set, maak sama waa kër baay, ci deretu jaamburi Yàlla ji Yowab tuuroon. ³² Su ko defee Aji Sax ji dina ko gàdduloo bakkanu boppam, feye ko ko bakkanu ñaar ña mu songoon, di Abner doomu Ner, njiital xarey Israyil, ak Amasa doomu Yeter, njiital xarey Yuda; muy ñu jub, ñu ko gën, teewul mu jam léen saamar, ñu dee te sama baay Daawuda yégu ko. ³³ Yal na Yowab ak askanam gàddu seen bakkan ba fàww. Waaye Daawudaak askanam ak waa këram ak ub jalam, yal na léen Aji Sax ji jàmmal ba fàww.» ³⁴ Ba loolu amee Benaya doomu Yoyada daldi dem jam Yowab, rey ko. Ñu suul ko ca këram ga ca màndiŋ ma. ³⁵ Gannaaw loolu Buur tabb Benaya doomu Yoyada ca boppu mbooloom xare ma, mu wuutu Yowab. Sadog °sarxalkat ba, Buur tabb ko, mu wuutu Abiyatar.

Nii la Simeyi mujje

³⁶ Ba mu ko defee Buur yónnee woolu Simeyi, wax ko ne ko: «Tabaxalal sa bopp kër fii ci Yerusalem, dëkk ca waaye bul dem fenn. ³⁷ Ndaxte bés boo fi jógee, ba jéggi xuru Sedoron, xamal xéll ne dee rekk mooy sab àtte, te yaay gàddu sa bakkanu bopp.» ³⁸ Simeyi ne Buur: «Baax na, Buur, sang bi. Li nga ma wax rekk de laay def, sang bi.» Ba loolu amee Simeyi toog Yerusalem lu yàgg.

³⁹ Waaye ñu teg ca ñetti at, ñaari jaami Simeyi daw dem ca Akis buuru Gaat doomu Maaka. Ñu wax Simeyi, ne ko: «Ndeke sa jaam yaa nga Gaat!» ⁴⁰ Simeyi daldi takk mbaamam, dem Gaat ca Akis, ngir jëli ay jaamam. Mu jëleji Gaat ay jaamam, delloosi léen. ⁴¹ Ba ñu waxee Buur Suleymaan, ne ko Simeyi jóge na Yerusalem dem Gaat, ba délsi, ⁴² Buur yónnee, woolu Simeyi, ne ko: «Xanaa giñloowuma la woon ci Aji Sax ji, artu la ne la: “Bés boo fi

jógee dem fenn, xamal xéll ne dee rekk mooy sa àtte.”? Nga ne ma: “Baax na, dinaa la déggal.” ⁴³ Ana lu waral nag sàmmoo la nga ngiñoon ci Aji Sax ji te ma santoon la ko?» ⁴⁴ Buur dellu ne Simeyi: «Yaw ci sa bopp xam nga xéll mboolem li nga lor sama baay Daawuda. Léegi Aji Sax ji dina la fey sa jëf ju bon, mu këppu ci sa kaw bopp. ⁴⁵ Waaye man Buur Suleymaan du ma teree barkeel; jalub Daawuda it day sax fàww fi kanam Aji Sax ji.» ⁴⁶ Buur nag sant Benaya doomu Yoyada, mu génne Simeyi, jam ko, mu dee. Ba loolu amee nguur ga gëna dëgër ca loxol Suleymaan.

Buur Suleymaan ñaan na Yàlla xel

3 ¹ Gannaaw ba loolu wéyee Suleymaan goromloo naak Firawna, buuru Misra, jël doomu Firawna, indi ko gox ba ñu naan Kër Daawuda, ba keroog muy noppee tabax këram ak kër Aji Sax ji ak tata ja wër Yerusalem. ² Terewul mbooloo ma di rendi ay sarax ca °béraabi màggalukaay ya, ndax ca yooya jamono tabaxaguñu woon kër gu ñu tudde Aji Sax ji. ³ Suleymaan nag wone na cofeelam ci Aji Sax ji, di wéy ci sàrti baayam Daawuda, xanaa lu moy béraabi màggalukaay ya rekk. Moom daan na fa rendi sarax, di fa taal cuuraay.

⁴ Ci biir loolu Buur dem Gabawon, sarxali fa, ndax fa la béraabu màggalukaay ba gënoona am solo féete: junniy °sarax yuy lakk ba jeex Suleymaan joxe na ko fa ca kaw °sarxalukaay booba. ⁵ Foofa ca Gabawon Aji Sax ji feeñu woon na fa Suleymaan ag guddi, ci gént. Yàlla ne ko: «Waxal loo bëgg, ma may la ko.» ⁶ Suleymaan ne ko: «Yaw de baaxe nga lool sab jaam Daawuda, saa baay, ngir na mu daan doxale fi sa kanam ci worma ak njekk ak xol bu dëggu. Nga baaxe ko lool, may ko doom ju góor ju toog ci jalam, bésub tey jii. ⁷ Léegi nag Aji Sax ji, sama Yàlla, fal nga ma buur, ma wuutu saa baay Daawuda. Waaye Sang bi, man ndaw lu tuut laa, xawma sax nu may doxale. ⁸ Rax-ci-dolli, Sang bi, ma nekk ci digg mbooloo mi nga tànn, di mbooloo mu yaa, ba maneesu ko waññ mbaa di ko lim. ⁹ Kon Sang bi, may

ma xel mu rafet mu may àttee sa mbooloo, ngir ma mana ràññee lu baax ak lu bon. Ndax xawma ku mana àtte sa mbooloo mu bare mii.»

¹⁰ Ñaanu Suleymaan googu nag neex Aji Sax ji. ¹¹ Mu ne ko: «Gannaaw loolu nga ñaan, te ñaanuloo fan wu gudd, ñaanuloo alal, ñaanuloo itam say noon dee, xanaa di ñaan xel mu rafet moo àttee dëgg, ¹² dama ne, dinaa la defal li nga ñaan, te sax dinaa la may xel mu rafet, nga am ug dégg, ba raw ku la jiitu ak ku la wuutu. ¹³ Te itam li nga ñaanul dinaa la ko may, booleel la alal ak daraja, ba doo am moroom ci buur yi, sa giiru dund. ¹⁴ Te soo jaaree ci samay yoon, jëfe samay sàrt ak samay santaane, muy fi sa baay Daawuda jaaroon, kon dinaa guddal saw fan.»

¹⁵ Ba loolu amee Suleymaan yewwu, daldi xam ne gént la woon. Mu dellu Yerusalem, taxaw fa kanam °gaalu kóllërey Aji Sax ji, def fa ay sarax yuy lakk ba jeex ak °saraxi cant ci biir jàmm, ba noppi berndeel jawriñam yépp.

Suleymaan wone na xelam

¹⁶ Ba loolu wéyee mu am ñaari gànc yu dikk ca Buur, agsi ca kanamam. ¹⁷ Senn ndaw sa ne: «Éy sang bi, maak ndaw sii de, danoo bokk genn kër, bokk fa wasin nun ñaar. ¹⁸ Ba ma amee doom ba mu am ñetti fan, moom mii itam mu am doom, te nun rekk a dëkk, keneen nekkul ak nun ca biir kër ga, xanaa nun ñaar. ¹⁹ Doomu ndaw sii nag dee ci guddi, ndax daa tédtoon ci kawam. ²⁰ Mu jóg ci xaaju guddi, jële sama doom fi sama wet, tëral ci wetam. Fekk man, sang bi, maa ngi nelaw. Doomam ji dee nag, mu tëral ko ci sama wet. ²¹ Naka laa jóg ci suba, di nàmpal sama doom, gisuma lu moy mu dee. Waaye bët set, ma xool ko bu baax, ndeke du sama doom ji ma jur.» ²² Seneen ndaw sa ne: «Déédéet, sama doom mooy dund, sa doom a dee.» Ku jëkk ka ne: «Déédéet, sa doom a dee, sama doom a ngi dund.» Ñu di ko werante fi kanam Buur.

²³ Buur ne: «Kii a ngi naan: “Sama doom jii mooy dund, sa doom a dee.” Kee naan: “Déédéet, sa doom a dee, sama doom mooy dund.”» ²⁴ Buur teg ca ne: «Indil-leen ma saamar!» Ñu indil Buur saamar. ²⁵ Buur ne: «Dogleen xale biy

dund ñaar, te jox kii genn-wàll, jox kee genn-wàll.» ²⁶Noonu ndaw si doomam di dund daldi ñeewante doomam. Mu ne: «Déet, sang bi, jox ko xale bi. Bu ko rey mukk!» Waaye ndaw sa ca des ne: «Deesu ma ko jox, deesu la ko jox; dogleen ko ñaar!» ²⁷Ba loolu amee Buur daldi àtte ne: «Joxleen ndaw sii liir biy dund, te buleen ko rey. Mooy ndeyam.»

²⁸Israyil gépp nag dégg àtteb Buur, daldi yéemu ci moom, ndax dañoo gis ne xelum Yàlla mu rafet a ngi ci moom, di ko jiite ci àtte dëgg.

Suleymaan fal na ay njiit

4 ¹Ci kaw loolu Buur Suleymaan di boroom Israyil gépp. ²Ay jawriñam ñii la woon: Asaryaa sētu Sadog moo doon °sarxalkat bi; ³Eliyoref ak Awiya doomi Sisa di bindkat yi; Yosafat doomu Ayilut yore kàddug Buur; ⁴Benaya doomu Yoyada jiite mbooloom xare ma; Sadog ak Abiyatar di ay sarxalkat. ⁵Asaryaa doomu Natan moo jiite woon ndawi Buur ya, Sabud doomu Natan di sarxalkat te di diglekatu buur. ⁶Ayisar moo doon saytu kër Buur, Adoniram doomu Abda di sase liggéeyi sañul-bañ ya.

⁷Buur Suleymaan amoon na fukki jawriñ ak ñaar ci Israyil gépp. Ñuy topptoo dundub Buur ak waa këram, weer wu nekk kenn ci ñoom yor dund ba, ba at mi mat. ⁸Ñooñoo di:

Ben Ur ma sasoo woon diiwaanu tundi Efrayim.

⁹Ben Deker sasoo Makas ak Saalbim ak Bet Semes ak Elon Bet Anan.

¹⁰Ben Keset sasoo Arubot, boole kook Soko ak mboolem diiwaanu Efer.

¹¹Ben Abinadab sasoo diiwaanu Dor bépp; Tafat doomu Suleymaan di soxnaam.

¹²Baana doomu Ayilut sasoo Taanag ak Megido ak diiwaanu Bet San gépp, feggook Sartan, fa féete Yisreel suuf, muy diggante Bet San ba Abel Mewola, ba ca wàllaa Yogmeyam.

¹³Ben Geber a sasoo woon Ramot ca Galàdd, booleek dëkk-dëkkaan ya làngu Yayir doomu Manase féetewoo woon, foofa ca Galàdd ak

diiwaanu Argob ca Basan. Muy juróom benn fukki dëkk yu mag yu ñu wërале ay tata ak seeni bunt ak yeti xànjар yu koy tëj.

¹⁴ Ayinadab doomu Ido sasoo Maxanayim.

¹⁵ Ayimaas ma sasoo Neftali; moom it jël na doomu Suleymaan ju ñuy wax Basmат soxna.

¹⁶ Baana doomu Usay boole diiwaanu Aser ak Beyalot.

¹⁷ Yosafat doomu Paruwa sasoo diiwaanu Isakaar.

¹⁸ Simeyi doomu Ela sasoo diiwaanu Beñamin.

¹⁹ Geber doomu Uri sasoo diiwaanu Galàdd, di réewum Siwon buuru Amoreen ña ak réewum Og buuru Basan. Muy benn ndawal buur bu yilif réew mooma.

²⁰ Waa Yuda ak Israyil dañoo bare woon, ba mel ni feppi suufas géej, di lekk, di naan, nekke mbégte.

5 ¹ Ci kaw loolu Suleymaan moo yilifoon mboolem réew ya dale dexu Efraat, ba ca dëkki Filisteen ña, dem ba ca digu réewum Misra. Ñooña di indil Suleymaan galag, nangul ko giiru dundam.

² Suleymaan daan na njëloo bés bu nekk ñeent fukki barigoy sunguf ak juróom (45), ak juróom ñeent fukki (90) barigo ci sunguf su ñagas; ³ ak fukki nag yu ñu yafal, ak ñaar fukki nagi parlu, ak téeméeri gàtt, te limaalessul xeeti kéwél yaak boroom dunq yu duuf ya. ⁴ Suleymaan moo yilifoon mboolem réew ma féete dexu Efraat sowu, dale ko ca Tifsa ba ca Gasa, muy mboolem réew ya féete dexu Efraat sowu. Jàmm ne ñoyy, féete ko wet gu nekk.

⁵ Noonu diirub ayu Suleymaan gépp, waa Yudaak Israyil ànd ak xel mu dal; ku ci nekk ak sa ker garabu reseñ ak sa ker garabu figg, fa dale diiwaanu Dan ba ca Beerseba. ⁶ Suleymaan amoon na ñeenti junniy (4 000) wuddi fasi watiir ak fukki junniy fas ak ñaar (12 000). ⁷ Jawriñ ya dañu daa ay-ayloo, ku nekk ak sa weer wi ngay topptoo dundub Buur Suleymaan, mook mboolem ñi mu bokkaloon njël, ba dara daawu ca ñàkk. ⁸ Peppum ors jeek ñaxum fas yeek

ñaxum fasi watiir yi itam, ku nekk ci ñoom da daan indi la ñu ko ca sas, teg ko fa mu wara nekk.

Suleymaan kenn la woon

⁹ Ci biir loolu Yàlla jagleel Suleymaan mu ñaw lool, am xel mu rafet ak xam-xamam bu yaa, bu solowoo fànn yu bare ni feppi suufas géej. ¹⁰ Suleymaan rafetoon nam xel, ba sut mboolem doomi réewum penku ak mboolem waa Misra. ¹¹ Rafetoon nam xel ba raw ñépp: muy Etan Eraseen ba, di Eman, di Kalkol, di Darda, doomi Maxol yu góor ya. Turam nag siiw ca mboolem xeet ya ko wër. ¹² Léeb na ñetti junniy kàddu, woy yi mu fent ëpp junni. ¹³ Faramfàcce na it mbirum gàncax, dale ko ci garabu seedar gu Libañ ba ci isob giy sax cib tabax. Jàngle na mbirum malaak njanaaw ak luy raam, ba ci jën. ¹⁴ Nit ñi dañu daan jóge ci xeet yépp, di sàkkusi xelam Suleymaan mu rafet; te dañu daan bàyyikoo ci mboolem buuri àddina yi déggoon xelam mu rafet.

Suleymaan waajal na tabaxu kër Yàlla ga

¹⁵ Ba Iram buuru Tir déggee ne Suleymaan lañu fal buur, mu wuutu baayam Daawuda, ak na mu xaritoo woon ak Daawuda naka jekk, Iram daa yónnee ay ndawam ca Suleymaan. ¹⁶ Suleymaan it yónnee ca Iram, ne ko: ¹⁷ «Xam nga sama baay Daawuda manul wona tabaxal Yàllaam Aji Sax ji kër gu mu ko tudde, ndax xare yi mu séqoon ak noonam yi ko wër, ba ni léen Aji Sax ji daaneele, mu teg léen tànk. ¹⁸ Léegi nag sama Yàlla Aji Sax ji may na ma jàmm ne ñoyy, féete ma wet gu nekk, ba awma benn noon, te musiba dabu ma. ¹⁹ Fii ma nekk damaa fas yéene tabax kër, tudde sama Yàlla Aji Sax ji. Muy la Aji Sax ji waxoon sama baay Daawuda, ne ko: “Sa doom ji may def sa kuutaay ci sab jal moo may tabaxal kër, tudde ma ko.” ²⁰ Ci biir loolu ma di la ñaan, nga santaane, ñu goral ma banti seedar yu Libañ, te samay surga ànd ak say surga ci liggéey bi. Sa peyooru nit ñi dinaa la ko fey ak loo mana feyeeku, ndax yaw xam nga ne amunu ci sunu biir ñu mane yett bant ni waa Sidon.»

²¹ Ba Iram déggee li Suleymaan wax, am na ca mbégte mu réy. Mu ne: «Cant ñeel na Aji Sax ji tey jii, bi mu mayee Daawuda doom ju rafet xel, mu jiite xeet wu réy wii.» ²² Noonu Iram yónnee ca Suleymaan, ne ko: «Dégg naa kàddu yi nga ma yóbbante. Man ci sama bopp dinaa la defal li nga bëgg lépp ci wàllu banti garabi seedar ak sippar^b. ²³ Samay surgaa koy diree Libañ ba ca géej ga, rabat ko, ma jaarale ko ci géej gi ba foo ma wax. Su ko defee ma tas ko foofa, nga yóbbu. Yaw nag nangul ma rekk li may sàkku, muy nga joxal ma sama waa kër ab dund.»

²⁴ Ba loolu amee Iram jox Suleymaan la mu bëgg ci banti garabi seedar ak sippar. ²⁵ Suleymaan ci wàllu boppam jox Iram ñaar fukki junni ak juróom ñetti (28 000) barigoy peppu bele, ak ñaar fukki barigo ak ñaar (22) ci diwu oliw gu ñu segal. Suleymaan di defal Iram noonu at mu ne. ²⁶ Bu loolu weesoo Aji Sax ji mayoon na Suleymaan xel mu rafet, na mu ko ko dige woon. Jàmm it doxoon na diggante Iram ak Suleymaan, ba ñu fasante °kóllère ñoom ñaar.

²⁷ Noonu Buur Suleymaan sas fanweeri junniy nit (30 000) ci Israyil gépp ay liggéeyi sañul-bañ. ²⁸ Mu di léen yebal Libañ, weer wu nekk fukki junni (10 000) dem. Bu ñu amee Libañ weer, am seeni kër ñaari weer. Adoniram a jiite woon sas ya. ²⁹ Suleymaan sàkk juróom ñaar fukki junniy (70 000) yenukat ak juróom ñett fukki junniy (80 000) yettkati doj ca tund ya, ³⁰ te bokkul ak ñetti junni ak ñetti tééméeri nit (3 300) ñi Suleymaan tabb, ñuy jiite liggéey bi, di saytu liggéeykat yi. ³¹ Buur santaane ñu jële fa doji tannéeef yu réy yu ñuy yett, muy kenug kër Yàlla ga. ³² Ba mu ko defee tabaxkati Suleymaan ak tabaxkati Iram ak waa Gebal di yett ak a waajal bant yaak doj, ya ñuy tabaxe kër ga.

Suleymaan tabax na kër Yàlla ga

6 ¹ Ca ñeenti tééméereelu at maak juróom ñett fukk (480), gannaaw ba °bànni Israyil génnee réewum Misra, ca ñeenteelu atu nguuru

^b 5.22 *sippar* garab la gu xeetook filaawo.

Suleymaan, ci weeru Siw, di ñaareelu weeru at ma^c, ca la Suleymaan tàmblee tabax kër Aji Sax ji.

² Kër gi Buur Suleymaan tabaxal Aji Sax ji, juróom benn fukki xasab^d la guddaay bi am, yaatuwaay bi di ñaar fukki xasab, taxawaay bi di fanweeri xasab. ³ Buntu °néeg bu mag bi ab dëru biti la jàkkaarloop, yaatuwaayu dér bi di ñaar fukki xasab, tollook yaatuwaayu kër gi. Guddaayam féete ci kanam kër gi, yokke guddaayu kër gi fukki xasab. ⁴ Mu defal miiri kër gi ay palanteer yu am feguwaay yu ñu we ay caax. ⁵ Mu tabax ay taax yu sës ca ñetti miiri kër gi. Taax yi dar ñaari miiri néeg bu mag bi ak miiru néegu biir bu sell bi ci gannaaw. Taax yi def ay néeg yu ndaw. ⁶ Taax mi féete suuf juróomi xasab mooy yaatuwaayam, taax mi ci tegu di juróom benni xasab. Taaxum kaw mi am yaatuwaayu juróom ñaari xasab; ndax dañoo bàyyi ay teguy làcc ci miiri kër gi, ngir xaddi taax yi baña jàpp ci miiri kër gi.

⁷ Kër ga, ba ñu koy tabax ay doj lañu ko tabaxe, muy doj yu ñu yett fa ñu ko jële ba noppi, moo tax du saddu, du sémmiñ mbaa lenn luy jumtukaayu weñ bu ñu dégg mu dal, diir ba ñuy tabax kër ga.

⁸ Buntu taax mi ci suuf ma nga féete woon ndijoor, nit mana jaare ci ay dëggastal, yéeg jàll ci taaxum digg mi, jóge ci taaxum digg mi, jàll ci taax mi ci kaw.

⁹ Suleymaan tabax kër gi ba noppi, xadde ko dénki garabi seedar ak gálluy seedar. ¹⁰ Taaxi kaw yi wër kër gépp, bu ci nekk juróomi xasab la def taxawaayam, lékkalee ko peeri garabu seedar, ba mu sës ca kër ga.

¹¹ Ci biir loolu kàddug Aji Sax ji dikkal Suleymaan. Mu ne ko: ¹² «Kër gii de yaa ngi koy tabax. Waaye soo sàmmeé samay dogal ak samay ndigal, di jëfe sama santaane yépp, di ci topp, su boobaa dinaa sottal li ma digoon sa baay Daawuda ci sa mbir. ¹³ Dinaa dëkk ci digg bànni Israyil, te дума дëddu Israyil, sama mbooloo.» ¹⁴ Noonu Suleymaan tabax kër gi, ba sottal ko.

^c **6:1 weeru Siw** moo yemook awril, jàpp me.

^d **6:2 xasab** mooy guddaayu loxo, diggante catu baaraamu digg ak conco.

Liggéey nañu biir kër gi

¹⁵ Fa féete biir nag, mu lale miir yi xànqi seedar, dale ko ci suuf ba ci xadd bi. Dafa lal biir kër gi bant, lal dër bi xànqi sippar. ¹⁶ Bàyyi na itam ñaar fukki xasab ci biir kër gi ci gannaaw, muy néeg bu mu lale banti seedar ci suuf ba ci xadd bi ci kaw. Mu sàkk ko ci biir kër gi, mu dib néegu biir bu sell, di °bérab bu sell baa sell. ¹⁷ Ñeent fukki xasab yi ko féete kanam di °néegu Yàlla bu mag bi. ¹⁸ Banti seedar yi lale ci biir kër gi, dees cee yett ay nataali koog ak tóor-tóor yu focci; lépp di bantu seedar, ba xeer feeñul.

¹⁹ Néeg bu sell baa sell ca biir kër ga ca biir-a-biir la waajal, ngir yeb fa °gaal gay def àlluway kóllérey Aji Sax ji. ²⁰ Néeg bu sell baa sell amoon na guddaayu ñaar fukki xasab, yaatuwaay ba di ñaar fukki xasab, taxawaay ba di ñaar fukki xasab; Suleymaan xoob ko wurusu ngalam. °Sarxalukaayu seedar ba jàkkaarlook néeg ba, ñu di ca taal cuuraay, moom it xoob na ko wurusu ngalam. ²¹ Noonu Suleymaan xoob biir néegu Yàlla ba wurusu ngalam. Mu tàllal ay càllalay wurus fi kanam néeg bu sell baa sell, ²² daldi xoob ci biir wurus ba mu daj.

Sarxalukaayu néeg bu sell baa sell, lépp la xoob wurus.

²³ Ci kaw loolu mu sàkk ca biir néeg bu sell baa sell ñaari malaakay °serub yu ñu yette bantu oliw, jëmm ju ci nekk am taxawaayu fukki xasab. ²⁴ Benn serub bi laaf mu ci nekk juróomi xasab la, muy fukki xasab ci catal menn laaf mi ba ca catal laaf ma ca des. ²⁵ Fukki xasab it mooy taxawaayu ñaareelu serub bi, ndax ñaari serub yee tolloo dayo, bokk bind; ²⁶ taxawaayub serub bu ci nekk fukki xasab la.

²⁷ Suleymaan teg serub ya ca digg néeg bu sell baa sell, seeni laaf fireeku, catal laafu benn serub bi di laal genn wetu tabax bi, catal laafu serub ba ca des di laal geneen wetu tabax bi. Seen ñaari cati laaf yi ci des it di laale fa tollook digg néeg ba. ²⁸ Mu teg ca xoob serub yi wurus.

²⁹ Noonu mu yettlu ay serub ci kaw miiri ñaari néegi kër gi, yettaale garabi ron ak i tóor-tóor yu focci, wërале. ³⁰ Xoob na itam dëru tabax bi wurus, ci néegu biir bi ak ci biti.

³¹ Buntu néeg bu sell baa sell kubéeri banti oliw la ko def, bunt bi njëëlam ak i jënam bant lañu yu bindoo juróomi wet. ³² Ñaari kubéer yi banti oliw la; mu yettlu ca kawam ay malaakay serub ak i ron ak i tóor-tóor yu focci, ba noppi xoob lépp wurus, xoobaale serub yi wurus ak ron yi itam. ³³ Noonu it la def buntu néeg bu mag bi, ay jënam di bantu oliw, waaye bunt bi njëëlam ak i jënam bant lañu yu bindoo ñeenti wet. ³⁴ Ñaari kubéeram di bantu sippar, bu ci nekk di ñaari xàñq yuy warangiku. ³⁵ Mu yettlu ci kaw kubéeri bunt yi jëmme serub ak i ron ak i tóor-tóor yu focci, daldi xoob lépp wurus.

³⁶ Suleymaan tabaxe miiru èttu biir bi xeeri yett ak xàñqi seedar, ba ñetti sësalandey xeer yu tegloo yu ne, benn sësalandeb xàñqi seedar tege ca.

³⁷ Ca ñeenteelu atu nguuru Suleymaan, yemook ñaareelu weer wa, di weeru Siw, ca lañu teg kenug kër Aji Sax ji. ³⁸ Ca fukkeelu at maak benn, yemook juróom ñetteelu weer wa, di weeru Bul^e, ca la kër ga sotti, mook mboolem la ca bokk ak na mu wara bindoo lépp. Suleymaan tabax na kër ga ci juróom ñaari at.

Suleymaan tabax na këram

7 ¹ Kërug boppam nag, Suleymaan tabax na ko ci fukki at ak ñett, doora sottal këram gépp. ² Ma nga jëkka tabax kër ga ñuy wooye Gottub Libañ. Guddaay bi di téeméeri xasab, yaatuwaay bi di juróom fukki xasab, taxawaay bi di fanweeri xasab, def ñeenti sàppey jëni seedar yu yenu ay gálluy seedar yu ñu yett. ³ Ñu teg ay banti seedar ci kaw gàllu, yi jën yi yenu: muy ñeent fukki gàllu ak juróom, sàppe bu nekk fukki gàllu ak juróom. ⁴ Mu am ñetti sësalandey palanteer yu ñu fege ay laat te ñu dékkaarloo ñett-ñett. ⁵ Bunt yépp ànd ak seen banti feguwaay, bunt bu ci nekk def ñeenti wet yu janoo màkk ñaar-ñaar; bunt yi sësalo te dékkaarloo ñett-ñett.

⁶ Ci biir loolu mu defar néeg ba ñuy wooye Néegu jëni kenu ya. Guddaay bi di juróom fukki xasab, yaatuwaay bi di fanweeri xasab, ak beneen néeg ci kanamam, mu ànd ak ay jëni kenoom ak xaddam bu mbaar ci kanam. ⁷ Mu

^e 6.38 *weeru Bul* moo yemook oktoobar, jàpp nowàmbar.

tabax néeg ba ñuy wooye Néegu ngàngune ma walla Àttekaay ba, mu di fa àttee. Mu dare néeg bi banti seedar ci suuf ba ci kaw.

⁸ Këram ga mu dëkk it, ñu tabaxe ko noonu ci gannaaw Néegu ngàngune ma. Suleymaan teg ca tabaxal soxnaam doomu Firawna ja geneen kër gu nirook këram.

⁹ Tabax yooyu yépp biir ak biti xeer tannéeef yu ñu yett la, natt ko, xacc ko, rataxal, dale ko ci kenu gi, ba ci cati xadd bi ci kaw, daleeti ci biti ba ci ètt bu mag bi. ¹⁰ Ñu defare kenu yi xeer tannéeef yu mag: yii di fukki xasab, yii di juróom ñetti xasab. ¹¹ Xeer yi tege ci kenu gi, xeer tannéeef la yu ñu yett, natt ko, yemale, booleek banti seedar. ¹² Miiru ètt bu mag bi dees koo wëralee ay xeer yett ak i xànqi seedar: ñetti sésalantey xeer yu tegloo yu ne, benn sésalanteb xànqi seedar tege ca. Mu mel ni na ñu def èttu kër Aji Sax ja ak dëru buntu kër ga.

Tëgg ba def na wàllam

¹³ Noonu Buur Suleymaan yónnee, jéli ca Tir ku ñuy wax Uram^f. ¹⁴ Doomu jëtun la woon, bakk ci giiru Neftali. Baayam dëkkoon Tir^g, di tëggub xànjjar. Uram di ku xareñ lool, rafet xel te mane mboolem liggéeyu xànjjar. Mu dikk ca Buur Suleymaan, liggéeyal ko la ñu ko sant lépp.

¹⁵ Mu móol ñaari xeri xànjjar, wu ci nekk taxawaayu fukki xasab ak juróom ñett, te wu ci nekk buumu fukki xasab ak ñaar a koy ub. ¹⁶ Ci biir loolu mu defar ñaari boppi xànjjar yu mu xelli, teg ko ci kaw xer yi, bopp bu ci nekk am taxawaayu juróomi xasab. ¹⁷ Bopp yi ci kaw xer yi, bu ci nekk da koo rafetale ab caaxu càllala, bopp bu ci nekk am ci juróom ñaar. ¹⁸ Mu defar ñaari jaray gërënaat, solal ko caax yi, wëralee ko bopp yi, ci xer wu ci nekk. ¹⁹ Bopp yi nekkoon ci kaw xer yi ci kanam nag bindoo ni lèppi tóor-tóor te bu ci nekk di ñeenti xasab. ²⁰ Bopp yi ci kaw ñaari xer yi, bu ci nekk ñaar téeméeri gërënaat a ko wër ci kaw, feggook gamb bi ci wàllaa caax bi.

^f **7.13 Uram** mooy Iram ba tey. Seetal it aaya 40 ak 45.

^g **7.14 Tir** ab dëkk la bu bokkul ci Israyil.

²¹ Mu samp xer yi ci kanam bunt °néegu Yàlla bu mag bi; samp xeru ndijoor wi, tudde ko Yakin (mu firi Day taxawal), samp xeru càmmoñ wi, tudde ko Bowas (mu firi Day dooleel). ²² Kaw xer yi ay læppi tóor-tóor yu ñu xellee ci tege. Noonu liggéeyu xer ya sotti.

²³ Ba mu ko defee Uram tegg mbalkam njàpp mu mag, ma ñuy wax Géej ga. Mu móol ko, mu mērgalu, di fukki xasab ci yaatuwaay, taxawaayam di juróomi xasab, te buumu fanweeri xasab di ko ub. ²⁴ Ay gamb la ko sàkkal ci suufu kéméj gi, fukki gamb tollook xasab. Mu def gamb yi ñaari caq yu wēr mbalka mi ba mu daj te ànd ak mbalka mi ci benn xelli. ²⁵ Mbalkam njàpp mi tege ci kaw fukki jēm̄mi nag ak ñaar, ñett jublu bēj-gànn̄aar, ñett jublu sowu, ñett jublu bēj-saalum, ñett jublu penku. Mbalka mi war nag yi, seeni gannaaw féete biir, ñoom ñépp. ²⁶ Dēllaayu mbalka mi tollook yaatuwaayu loxo. Ñu defar kéméj gi, mu mel ni gēm̄miñu kaas, di nirook læppi tóor-tóor. Mbalka miy duy ñaar téem̄eri barigo ak fanweer (230).

²⁷ Mu daldi sàkk fukki rootukaayi xàñjar yu ñuy dawal, bu ci nekk am guddaayu ñeenti xasab, yaatuwaayam di ñeenti xasab, taxawaayam di ñetti xasab. ²⁸ Ni ñu defare rootukaay yi nii la: ay wetam lañu defare làcci xàñjar, lēkkalee làcc yi ay laat. ²⁹ Muy làcc yu Uram yett ci kawam ay gaynde, ay nag ak malaakay °serub. Kaw laat yi itam am na ci nataal yi. Mu yett ay caqi tóor-tóor yuy lang ci suufu gaynde yeek nag yi. ³⁰ Rootukaay bu nekk am na ñeenti mbegey xàñjar yu ñu lēkkalee yeti xàñjar. Mu am ay kenu yu ñu xellil rootukaay bi ci ñeenti koñam, kenu yi yenu benn bagaan te am ay nataali tóor-tóor. ³¹ Gēm̄miñu rootukaay bu nekk amoon na omb bu mērgalu bu bagaanu ndox biy tege. Xóotaayu gēm̄miñ gi di xasab, yaatuwaay bi di xasab ak genn-wàll. Ñu yett ci kaw gēm̄miñ gi ay nataal ba tey. Rootukaay bi mērgaluwul, waaye daa bindoo ñeenti wet yu janoo màkk ñaar-ñaar te yem kepp. ³² Ñeenti mbege yi ronu làcc yi, tóori weñ yi ci wewe sax ci rootukaay bi. Mbege mu ci nekk am na taxawaayu xasab ak genn-wàll. ³³ Mbege yi bindoo ni mbegey watiiri xare. Tóor yeek mbege yi ak sidditi mbege yi ak ñanku yi, xàñjar lañu ko xellee. ³⁴ Ñeenti kenu yi ci ñeenti koñi rootukaay bi,

bu ci nekk dees koo xelleendook weti rootukaay yi, ba lépp di benn. ³⁵ Kaw boppu rootukaay bu nekk, kéméj gu mërgaloo féete ci kaw, taxawaayam di genn-wàllu xasab, njàppu yeek làcc yi sax ci, lépp di benn. ³⁶ Fi amul dara ci kaw njàppu yeek làcc yi, mu ñaas ci ay nataali serub ak i gaynde ak i garabi ron yu ñu wërale ay caqi tóor-tóor. ³⁷ Noonu la Uram defare fukki rootukaay yi. Lépp bokk móol, yem dayo te bokk bind.

³⁸ Mu defar itam fukki bagaani xàñjar; bagaan bu ci nekk tollook ñeenti xasab, di def lu xawa tollook juróomi barigo; bagaan bu ci nekk tegu cib rootukaay, ba fukki rootukaay yi daj.

³⁹ Ba mu ko defee mu taaj juróomi rootukaay fa féete kër Yàlla ga ndijoor ak juróomi rootukaay fa féete kër ga càmmoñ. Mu teg mbalkam jàpp mi fa féete kër ga ndijoor, ca wetu bëj-saalum, jàpp penku.

⁴⁰ Uram teg ca sàkk bagaan yu ndaw yi ak tonnikaay yi ak këll yi.

Noonu mu sottal mboolem liggéey ba ko Buur Suleymaan santoon mu defal ko kër Aji Sax ji: ⁴¹ muy ñaari xer yi ak ñaari gamb yiy boppi xer yi, ak ñaari caaxi càllala yiy muur ñaari gamb yi; ⁴² ak ñeenti téeméeri gërënaat yiy ànd ak ñaari caax yi; caax bu nekk, ñaari caqi gërënaat, ñu dar ñaari gamb yiy boppi xer yi; ⁴³ ak fukki rootukaay yi ak fukki bagaan yi ci kaw rootukaay yi.

⁴⁴ Mbalkam jàpp mi it ci la, ak fukki nag ak yaar yi ronu mbalkam jàpp mi.

⁴⁵ Bagaan yu ndaw yi bokk na ci, ak tonnikaay yi ak këll yi. Mboolem yooyu jumtukaayi kër Aji Sax ji, xàñjar bu ñu jonj la Buur Suleymaan sant Uram, mu defare ko. ⁴⁶ Buur xellilu léen ci ay móoli ban ca jooru Yurdan, diggante Sukkóot ak Sartan. ⁴⁷ Suleymaan daldi bàyyi jumtukaay yooyu yépp noonu, nattul diisaayu xàñjar ba ca dem, ndax bare gu mu bare.

⁴⁸ Gannaaw loolu Suleymaan defarlu na mboolem yeneen jumtukaayi kër Aji Sax ji: muy °sarxalukaayu wurus bi ñuy taal cuuraay, ak taabalu wurus bi ñuy teg mburum teewal mi^h ⁴⁹ ak tegukaayi làmpi wurusu ngalam yi, juróom ci wetu ndijoor, juróom ci wetu càmmoñ, fi kanam néeg bu sell baa sell;

^h 7.48 *mburum teewal mi* mooy mburu mi ñuy teewal fi kanam Aji Sax ji.

tegukaay yi ànd ak seeni tóor-tóor, ak seeni làmp ak seeni ñiim, lépp di wurus; ⁵⁰ ndab yi itam di wurusu ngalam, ak feyukaay yi ak këll yi ak kopp yi ak andi cuuraayu yi ak ngoosi wurus yi bunti biir kër gi wewe, ñu di fa jaare dugg ca °bérab bu sell baa sell, ak ngoosi wurus yi beneen buntu kër gi wewe, te ñu di fa jaare dugg ci néegu Yàlla bu mag bi.

⁵¹ Ba loolu amee mboolem lu Buur Suleymaan liggéeyal kër Aji Sax ji daldi sotti. Mu boole xalis baak wurus waak jumtukaay ya baayam Daawuda sellalaloon Aji Sax ji, yeb ko ca denc ya def alali kër Aji Sax ji.

Sancal nañu gaalu Yàlla ga

8 ¹ Ba mu ko defee Buur Suleymaan woolu magi Israyil. Mboolem kilifay giiri Israyil ak seen njiiti kër maam ya daje Yerusalem ca moom, ngir ñu àgg °Siyon, gox bu ñu naan Kër Daawuda, ba yékkatee fa °gaal ga kóllérey Aji Sax ji dence.

² Waa Israyil gépp nag daje ca Buur Suleymaan, ca màggalu juróom ñaareelu weer wa, di weeru Etanimⁱ. ³ Ba magi Israyil ñépp dikkee, °sarxalkat ya yékkati gaal ga. ⁴ Ñu boole gaalu Aji Sax ja, ak °xaymab ndaje ma, ak mboolem jumtukaay yu sell ya ca biir xayma ba. Sarxalkat ya ak °Leween ña daldi gàddu lépp. ⁵ Buur Suleymaan ak mbooloom Israyil ma daje fa moom, ñoom ñépp teew. Ñu jàkkaarlook gaal ga, di rendi ay gàtt ak i nag yu kenn manula lim mbaa nga di ko waññ ndax bare.

⁶ Gannaaw loolu sarxalkat ya yóbbu gaalu Aji Sax ja ca bérabam, ca néegu biiru kër Yàlla ga, ca °bérab bu sell baa sell, ca ron laafi malaakay °serub ya. ⁷ Ndaxte jëmme serub ya, seeni laaf daa tàllalu, tiim fa gaal gay toog. Laaf ya yiir kaw gaal ga ak i njàppoom. ⁸ Njàppu ya daa guddoon, ba nit mana séen cat ya te fekk ko toll ca bérab bu sell ba ca kanam néeg bu sell baa sell. Waaye maneesula toll ca biti di séen cat ya. Njàppu yaa nga fa ba tey jii. ⁹ Dara nekkuloon ca biir gaal ga, lu moy ñaari àlluway doj ya ca Musaa

ⁱ **8.2 weeru Etanim** moo yemook sàttumbar, jàpp oktoobar, ñu do ca amal màggalu Mbaar ya.

yeboon ca tundu Oreb^j, fa Aji Sax ji fasante woon °kóllère ak °bànni Israyil, gannaaw ba ñu génnee réewum Misra.

¹⁰ Ba sarxalkat ya génnee bérab bu sell ba, niir wa daa fees kër Aji Sax ja, ¹¹ ba sarxalkat ya talatuño liggéey, ndax leeru Aji Sax ja daa nekkoon ca niir wa, niir wa feesal kër ga.

Suleymaan àddu na

¹² Ba mu ko defee Suleymaan ne: «Aji Sax ji waxoon na ne dinay dëkk ci niir wu fatt.» ¹³ Mu ne Aji Sax ji: «Tabaxal naa laa tabaxal kër gu yànj, muy sa kër gooy dëkk fàww.» ¹⁴ Buur Suleymaan walbatiku, ñaanal mbooloom Israyil mépp, fekk mbooloom Israyil mépp a nga taxaw. ¹⁵ Mu ne: «Cant ñeel na Aji Sax ji, Yàllay Israyil, moom mi wax ak sama baay Daawuda ci gémminam te sottaal na li mu waxoon ci kàttanam. Ndax noon na ko: ¹⁶ “La ko dale ca bés ba ma génnee °bànni Israyil, sama ñoñ ca Misra ba tey, tànnuma benn dëkk, ci genn giiri Israyil, bu ñu may tabaxal kër, tudde ma ko. Waaye tànn naa la yaw Daawuda, fal la, nga jiite Israyil, sama ñoñ.” ¹⁷ Sama baay Daawuda nag fasoon na yéene tabax kër gu mu tudde Aji Sax ji, Yàllay Israyil. ¹⁸ Waaye Aji Sax ji wax sama baay Daawuda, ne ko: “Gannaaw am nga yéeneey tabax kër, tudde ma ko, def nga lu rafet, ngir moo doon sa yéeneey xol. ¹⁹ Waaye du yaw yaay tabax kër gi; sa doom ju góor ju soqikoo ci sa geño, moom mooy tabax kër gi, tudde ma ko.”

²⁰ «Aji Sax ji sàmm na waxam ja mu waxoon. Wuutu naa sama baay Daawuda, toog ci jalub Israyil, muy la Aji Sax ji waxoon. Tabax naa kër gi, tudde ko Aji Sax ji, Yàllay Israyil. ²¹ Sàkk naa fa it bérab, jagleel ko °gaal gi def àlluway kóllèrey Aji Sax, ji mu fasoon ak sunuy maam, ba mu léen génnee réewum Misra.»

^j 8.9 Oreb mooy Sinayi ba tey.

Suleymaan yékkati na kàddug ñaan

²²Noonu Suleymaan taxaw jàkkaarlook °sarxalukaayu Aji Sax ji, fa kanam mbooloom Israyil mépp. Mu tàllal ay loxoom asamaan, ²³daldi ne: «Yaw Aji Sax ji Yàllay Israyil, amul jenn yàlla ju mel ni yaw ci kaw asamaan mbaa ci suuf, yaw miy sàmm sa °kóllèreek sa ngor sa digganteek sa jaam ñi la toppe xol bu la wéetal. ²⁴Sàmm nga wax ja nga waxoon sama baay Daawuda, sab jaam, te sottal nga ko bés niki tey ci sa kàttan.

²⁵«Aji Sax ji, Yàllay Israyil, léegi nag, ngalla sàmmal li nga waxoon sama baay Daawuda, sa jaam ba, ne ko: “Deesu la xañ mukki ci saw askan ku góor kuy toog ci kaw jalub Israyil ci sama kanam, ndegam saw askan a ngi moytu seen bopp, di ma déggal tey jéfe ni nga daan jéfe.” ²⁶Kon nag yaw Yàllay Israyil, ngalla sottalal wax jooju nga waxoon sama baay Daawuda, sa jaam ba.

²⁷«Waaye yaw Yàlla! Ndax dinga dëkk ci kaw suuf sax? Seetal rekk, asamaan ba ca asamaani asamaan yi manu laa fat, waxumalaa kër sii ma tabax. ²⁸Waaye Aji Sax ji, sama Yàlla, rikk, teewlul li ma lay ñaan, man sab jaam, di la ko dagaan; ngalla déggal sama yuux, te nangu ñaan gi ma lay ñaan bés niki tey. ²⁹Yal nanga ne jàkk guddeek bëccëg ci kër gii, di bérab bi nga noon: “Fi la sama tur di nekk,” te yal nanga dégg ñaan gi ma jublu bérab bii, di ko ñaan, man sab jaam. ³⁰Yal nanga ma nangul samag ñaan, nangul Israyil sa mbooloo. Bu ñu jubloo bérab bii, ñaan la, yal nanga ko dégge fa nga toll ca asamaan, daldi léen nangul, jéggal léen.

³¹«Ku ñu tuumaal ne moo tooñ moroomam, te yoon teg ko mu wara waatsi fi sa sarxalukaay bi ci biir kër gii, ³²rikk nanga ko dégge ca asamaan te jo sa loxo ci mbir mi, àtte say jaam, ba daan ki tooñ, mu jot yoolu jéfam, te nga setal deru ki tooñul, ba jox ko dëgg.

³³«Bu ab noon dumaa Israyil, sa mbooloo, ndax tooñ gu ñu la tooñ, bu ñu wañnikoo ci yaw, tudd la, diis la seeni ñaan ak seeni dagaan ci biir kër gii, ³⁴su boobaa yal nanga toll fa asamaan, dégg Israyil sa mbooloo, ba baal léen séen bàkkaar te delloo léen ca réew ma nga joxoon seeni maam.

³⁵ «Bu asamaan tëjoo, taw amul ndax tooñ gu ñu la tooñ, bu ñu jubloo bérab bii, ñaan la, tudd fi sa tur te dëddu seen bàkkaar ndax sa mbugal, ³⁶ su boobaa ngalla nanga toll fa asamaan, dégg sa jaam ñii di Israyil sa mbooloo, ba jéggal léen. Ngalla jàngal léen bu baax yoonu njub wi ñu wara jaare te nga taw ci sa kaw suuf, si nga joxoon sa mbooloo, muy seen cér.

³⁷ «Bu xiif dikkee ci réew mi mbaa mbas mbaa gàncax gi lakk mbaa benaat xuural ko, mbaa mu diy njéeréer mbaa soccet ak noon yu song réew mi, ba gaw fi ab dëkk, mbaa muy lépp luy musiba ak jàngoro, su boobaa, ³⁸ lépp lu ciy ñaan ak ug tinu gu bawoo ci ku mu mana doon ci sa mbooloom Israyil te fekk ku ci nekk réccu ci xolam, ba tàllal ay loxoom jublook kër gii, ³⁹ ngalla kon nanga léen dégge fa nga toll ca asamaan. Nanga léen baal te jo sa loxo ci mbir mi. Yoolal ku nekk mboolem ay jëfam, ndax xam nga xolam, ngir yaw rekk yaa xam xolu nit ku nekk. ⁴⁰ Su ko defee dinañu la ragal seen giiru dund ci biir réew mi nga joxoon sunuy maam.

⁴¹ «Te itam doxandéem bu jóge réew mu sore ndax sa tur wu mu dégg, te bokkul ci sa mbooloom Israyil, ⁴² — ndax kat dees na dégg sa tur wu réy ak sa doole ju bareek sa kàttan gu yéeme — bu ñewee jublu ci kër gii, ñaan la, ⁴³ ngalla nanga toll fa asamaan, dégg doxandéem bi, defal ko mboolem lu mu la ñaan, ndax xeeti àddina yépp xam la te ragal la, ni la sa mbooloom Israyil xame, ragale la ni, te ñu xam ne sa tur a ngi teew ci kër gii ma tabax.

⁴⁴ «Bu sa mbooloo demee ci sa ndigal, di xarejeek noonam, ba ñaan ci yaw Aji Sax ji, jublook dëkk bi nga tànn ak kër gi ma tabax tudde la ko, ⁴⁵ ngalla nanga toll asamaan, dégg seen ñaan ak seeni dagaan te dëggal léen.

⁴⁶ «Amul ku dul moy, kon bu ñu la moyee, ba nga mere léen, teg léen ci loxol noon bi, mu jàpp léen, def léen i jaam, yóbbu réewam, mu sore mbaa mu jege, ⁴⁷ ba gannaaw gi ñu tuub, seen xol walbatikoo ca réew ma ñu léen jàpp njaam, ba ñu tinu la ca réew ma ñu léen note, ne la bàkkaar nañu, def nañu lu jekkadi te jubadi, ⁴⁸ bu ñu wañnikoo ci yaw, seen lépp wéetal la, foofa ca seen réewu noon, ya léen jàpp, ba ñaan la, jublook seen réew ma nga joxoon seeni maam, ak dëkk bi nga tànn, ak kër gii ma tabax, tudde la ko,

⁴⁹ ngalla su boobaa, nanga dëgge seen ñaan ak seeni tinu fa nga toll ca asamaan te dëggal léen. ⁵⁰ Baalal sa mbooloo seeni moy ak mboolem seeni toon seen digganteek yaw, te nga nooyal xoli ña léen not, ngir ñu laaye léen biir. ⁵¹ Ndax kat ñoo di sa mbooloo mi nga séddoo, génnee léen Misra, taalu xellikaayu weñ gu ñuul ga.

⁵² «Sang bi, teewlul bu baax samay tinu ak sa tinuy mbooloom Israyil mii, ba nangul léen mboolem lu ñu la jooy, ⁵³ ndaxte danga léena ber ci biir xeeti àddina yépp, séddoo léen, te waxoon nga ko, Musaa sa jaam ba jottali ko, ba ngay génne sunuy maam Misra, yaw Boroom biy Aji Sax ji.»

Suleymaan ñaanal na bànni Israyil

⁵⁴ Ba Suleymaan noppee ñaan Aji Sax ji mboolem ñaanam ya ak dagaanam yooyu, daa siggee ca °sarxalukaayu Aji Sax, ja mu sukoon tàllal loxo ya, jublu asamaan. ⁵⁵ Mu taxaw, di ñaanal mbooloom Israyil mépp, daldi àddu ca kaw ne: ⁵⁶ «Cant ñeel na Aji Sax, ji may Israyil mbooloom fu mu nopploo, muy la mu waxoon lépp, ngir benn baat fanaanul àll ci digey jàmm yi mu dige woon yépp, Musaa jaamam ba jottali. ⁵⁷ Yal na sunu Yàlla Aji Sax ji ànd ak nun, na mu ànde woon ak sunuy maam. Yàlla bu nu wacc muk mbaa mu di nu dëddu. ⁵⁸ Yal na nu xiir ci boppam, nuy tegu ci yoonam yépp, di jëfe ay santaaneem ak i dogalam ak àttey yoonam yi mu dénkoon sunuy maam. ⁵⁹ Sama kàddu yii ma ñaan fi kanam Aji Sax ji, yal na doon lu sunu Yàlla Aji Sax ji def yitteem guddeek bëccëg. Mu di ma dëggal, man jaamam, di dëggal Israyil mbooloom, saa yu nu ko soxlaa. ⁶⁰ Su ko defee xeeti àddina yépp dinañu xam ne Aji Sax ji mooy Yàlla, te amul moroom. ⁶¹ Waaye nag nangeen jox Aji Sax ji sunu Yàlla xol, wéetal ko ba mu mat sëkk, ngir ngeen mana ténku ciy dogalam tey jëfe ay santaaneem ni bésub tey.»

Suleymaan daloo na kër Yàlla ga

⁶² Ba loolu amee Buur Suleymaan ànd ak Israyil gépp, rendil Aji Sax ji ay sarax. ⁶³ Mu defal Aji Sax ji °saraxi cant ci biir jàmm, lépp di ñaar fukki junniy

nag ak ñaar (22 000) ak téeméeri junniy gàtt ak ñaar fukk (120 000). Noonu Buur ak °bànni Israyil gépp jagleel Aji Sax ji kër Yàlla ga. ⁶⁴Bésub keroog Buur daa sellal digg ètt ba janook kër Aji Sax ji, rendi fa °sarax suy lakk ba jeex, joxe fa °saraxu pepp ma ak nebbonu saraxu cant ci biir jàmm, ndax saraxu lakk mu jeex ba ak saraxu pepp ma ak nebbonu saraxu cant ga ci biir jàmm, loolu lépp xajuloon ca °sarxalukaayu xànjari bay nekk fa kanam Aji Sax ji.

⁶⁵Suleymaan di màggal diiru fan yooyu, ànd caak Israyil gépp, muy ndaje mu réy. Nit ñi jóge Lebo Amat ca bëj-gànnar ba ca xuru Misra ca bëj-saalum, di màggalsi fi sunu Yàlla Aji Sax ji, ba mu am juróom ñaari fan, tegaat ca juróom ñaari fan, muy fukki fan ak ñeent. ⁶⁶Ba bés ba délsiwaatee, Suleymaan yiwi mbooloo ma, ñu taggtook moom, ba noppi ñibbi seeni kër, boole mbégte ak bannexu xol ndax mboolem lu baax li Aji Sax ji defal Daawuda jaamam ba, defal ko Israyil, mbooloom.

Aji Sax ji feeñu na Suleymaan

9 ¹Ba Suleymaan tabaxee kër Aji Sax ji ak kër Buur, ba sottal lépp lu mu bëggoona def, ²la ko Aji Sax ji feeñu ñaareel bi yoon, na mu ko feeñoo woon Gabawon. ³Aji Sax ji ne ko: «Dégg naa li nga ñaan, di ma ko dagaan. Sellal naa kër gii nga tabax, ngir dëj fi sama tur ba fàww. Teg naa ci sama bët, jàpp ko ci sama xol ba fàww.

⁴«Yaw nag, soo ma toppee ni ma sa baay toppe woon cig mat ak ug njub, di def lépp lu ma la sant, di sàmm samay dogal ak sama àttey yoon, ⁵kon dinaa saxal sab jal ci kaw Israyil ba fàww, muy la ma waxoon sa baay Daawuda, ne ko: “Deesu la xañ ku góor kuy toog ci jalub Israyil.” ⁶Waaye su ngeen ma dëddoo ba dëddu ma, yéen ak seeni sët, ba jëfewuleen samay santaane ak sama dogal yi ma léen tëralal, xanaa di topp yeneen yàlla, di léen jaamu, ⁷su boobaa dinaa dagg °bànni Israyil, mu jóge fi déndu suuf bi ma léen jox. Te kër gii ma sellaloon ngir sama tur dinaa ko xalab. Kon Israyil doon ñu ñuy lééboo ci biir xeet yépp.

⁸ «Su boobaa kër gii dina gent te képp ku ko romb dina yéemu tey muslu ci lu ni mel. Dinañu ne: “Lu tax Aji Sax ji def nii réew mii ak kër gii?” ⁹ Ñu ne léen: “Li ko waral mooy dañoo dëddu seen Yàlla Aji Sax, ji jële seeni maam réewum Misra, di ànd ak yeneen yàlla, di léen topp ak a jaamu. Moo tax Aji Sax ji teg léen musiba mii mépp.”»

Buur Suleymaan jëflante naak Buur Iram

¹⁰ Diiru ñaar fukki at yi Suleymaan tabax ñaari kër yi, di kër Aji Sax ji ak kër Buur, ¹¹ Iram buuru Tir jox na Suleymaan ay banti garabi seedar ak sippar^k, ak mboolem lu mu soxla ci wurus. Buur Suleymaan jox Iram ñaar fukki dëkk ci diiwaanu Galile. ¹² Ci kaw loolu Iram bàyyikoo Tir, seeti dëkk ya ko Suleymaan jox, waaye dëkk ya neexu ko. ¹³ Mu ne ko: «Sama waay, dëkk yi nga ma jox nag?» Mu daldi tudde dëkk ya réewum Kabul^l, mooy turam ba tey jii. ¹⁴ Iram yónnee woon na Buur fanweeri barigoy wurus ak juróom.

¹⁵ Buur Suleymaan dafa dogaloon liggéeyu sañul-bañ bu mu sas ay nit. Ñu tabax kër Aji Sax ji ak kèru boppam ak sèkkub Milo^m ak tatay Yerusalem ya ak dëkk yii di Asor, Megido ak Geser. Ni mu deme nii la: ¹⁶ Firawna buuru Misra moo daloon ci kaw Geser, nangu dëkk ba, lakk ko, rey Kanaaneen ña ca dëkkoon, daldi may dëkk ba doomam jay soxnas Suleymaan, muy yebam. ¹⁷ Suleymaan tabaxaat Geser ak Bet Oron Suuf ¹⁸ ak Baalat ak Tamarⁿ ca màndiñu réew ma, ¹⁹ ak mboolem dëkki dencukaayam ak dëkk ya watiiri xareem dence ak dëkk ya fas ya nekk. Mu tabax lépp lu mu bëgg ci biir Yerusalem ak ca tundu Libañ ak mboolem réew ma mu moom.

²⁰ Amoon na ñu des ca réew ma, di mboolem Amoreen ñaak Etteen ñaak Periseen ñaak Eween ñaak Yebuseen ña, waaye bokkuñu woon ci ˆbànni Israyil. ²¹ Seen sët ya léen wuutu ca réew ma, waa Israyil manu léen woona boole aayalal Aji Sax ji, faagaagal léen. Suleymaan nag dugal léen ci liggéeyu

^k **9.11 sippar:** seetal ci 5.22.

^l **9:13 Kabul** man na firi Jarul dara.

^m **9.15 Milo** xur la wu doxoon diggante kër Yàlla ga ak gox ba ñu naan Kër Daawuda. Suleymaan sèkklu ko.

sañul-bañ, ñu doon ay jaam ba tey jii. ²² Waaye ñi bokk ci bànni Israyil, Suleymaan defu léen i jaam, ndax ñoo doon ay xarekatam. Ñii di ay dagam ak i jawriñam, ñee di njiiti xareem ak i boroom watiiri xareem, ña ca des di dawalkati watiiram. ²³ Ñoo doon itam saytukat yi yore liggéeyi Suleymaan. Amoon na juróomi téeméeri jawriñam ak juróom fukk (550) yu daan jiite nit ñiy def liggéey bi.

²⁴ Doomu Firawna ja nag jóge gox ba ñu naan Kër Daawuda, séyi kër ga ko Suleymaan tabaxal. Gannaaw gi Suleymaan tabax na sëkkub Milo.

²⁵ Suleymaan di def ñetti yoon cim at ay °sarax yuy lakk ba jeex ak °saraxi cant ci biir jàmm, di ko sarxal ci kaw °sarxalukaay bi mu tabaxal Aji Sax ji, boole ci di taal cuuraay ci kaw sarxalukaay bi, fi kanam Aji Sax ji. Mu daldi matal la war ca kër Yàlla ga.

²⁶ Ci biir loolu Suleymaan defarlu gaal yu mag ca Esiyon Geber ga ca wetu Elat ca réewum Edom, ca tefesu géeku Barax ga. ²⁷ Iram yebal ay nitam, ñuy mool yu xam géek. Ñuy liggéeyandook niti Suleymaan ca gaal ya. ²⁸ Noonu ñu ànd dem Ofir, jële fa téeméeri barigoy wurus ak ñaar fukk, indil Buur Suleymaan.

Lingeer buuru Saba seetsi na Suleymaan

10 ¹ Ci kaw loolu Lingeer bay buuru Saba dégg Suleymaan ak tur wa mu amoon te Aji Sax ji tax. Mu dikk di nattusi xelum Suleymaan, di ko cax cax yu jafe. ² Mu agsi Yerusalem, ànd ak topp mu takku lool ak giléem yu sëf ay ndàbb yu xeeñ ak wurus wu baree bare ak per yu jafe. Ba mu dikkee ci Suleymaan, daldi koy wax mboolem la mu jàppoon ci xelam. ³ Suleymaan tontu ko li mu ko laaj lépp, ba du lenn lu mu laaj lu tiiñ Buur, ba leeralalu ko ko. ⁴ Lingeer buuru Saba gis ni Suleymaan rafetem xel ak kër ga mu tabax, ⁵ ak njëlam ak jataayu dagam ya ak liggéeyu surgaam ña ak seen col ga ak ñay topptoo ay naanam, ak saraxam ya muy sarxal ca kër Aji Sax ji, di °sarax yay lakk ba jeex. Mu yéemu, ba ne tesax.

ⁿ 9.18 *Tamar* dees na ko wax Tadmor ba tey.

⁶ Mu ne Buur: «La ma déggoon ca sama réew ci say mbir ak sa xel mu rafet kay, dëgg la! ⁷ Gëwma ko woon ba bi ma ñëwee, ba teg ci sama bët. Ndeke genn-wàll gi sax waxeesu ma ko woon. Weesu nga fopp la ma déggoon ci yaw, ci xel mu rafet ak alal. ⁸ Ndaw mbégte mu réy ci say nit! Ndaw mbégte ci sa jawriñ ñii sa kanam, di dëgg sa kàddu yu xelu! ⁹ Cant ñeel na sa Yàlla Aji Sax ji, moom mi la bége, ba teg la ci jalub Israyil. Aji Sax ji daa sopp Israyil cofeel gu dul jeex, moo tax mu fal la buur, ndax nga saxal fi dëgg ak njekk.»

¹⁰ Noonu Lingeer buuru Saba may Suleymaan fanweeri barigoy wurus ak juróom, ak cuuraayu ndàbb lu ne gànñ, ak i per yu jafe. Amul ndàbb lu fa dikkati gannaaw loolu te tollook la Lingeer buuru Saba mayoon Buur Suleymaan.

¹¹ Ci kaw loolu gaali Buur Iram ya daan jële wurus ca réewum Ofir, indaale lu takkoo takku ci banti sàntaal ak i per yu jafe, jële ko Ofir. ¹² Buur jël banti sàntaal ya, defaral ci kër Aji Sax ji ak kër Buur ay sèppukaayi kaw taax ak xeeti xalam ngir xalamkat yi. Amul banti sàntaal bu fa masa dikk, toll noonu te giseesu fi lu ni toll booba ba tey.

¹³ Buur Suleymaan itam may Lingeer buuru Saba mboolem lu mu bëgg te ñaan ko ko. Bokkewul ak li ko Suleymaan joxal boppam ci tabe gu buur bu toll ni moom yellool. Ba loolu amee Lingeer buuru Saba bàyyikoo fa mook toppam ma, ñibbi réewam.

Suleymaan bare woon na alal

¹⁴ Diisaayu wurus wa Suleymaan daan jot at mu nekk nag ñaar téeméeri barigo, ¹⁵ te limaalesul galag ya muy jële ca jaaykat ya ak jula yaak mboolem buuri sowub jant yaak jaraafi réew ma.

¹⁶ Buur Suleymaan nag sàkklu ñaar téeméeri pakk yu mag, di wurus wu ñu tégg ba mu jekk, benn bu ci nekk di juróom benni kilo, ¹⁷ ak ñetti téeméeri pakk yu ndaw, di wurus wu ñu tégg ba mu jekk, pakk bu ci nekk di kilo ak liibar. Noonu Buur boole ko denc ca këram ga ñuy wax Gottub Libañ.

¹⁸ Buur teg ca sàkk ngàngunem bëñi ñay, di mu mag, mu xoob ko wurusu ngalam. ¹⁹ Juróom benni dëggastal la ngàngune ma am, wéeruwaay ba mērgalu ca kaw. Mu am loxo wet gu nekk. Loxo yaa nga feggook ñaari jēm̄mi gaynde yu taxaw, wet gu nekk benn. ²⁰ Mu am it fukki jēm̄mi gayndeek ñaar yu taxaw ca ñaari weti juróom benni dëggastal ya, ñaari gaynde séq ndëggastal lu nekk. Sàkkeesul lu ni mel ci genn nguur!

²¹ Mboolem lu Buur Suleymaan daan naane wurus la, te mboolem ndabi kēram ga ñuy wax Gottub Libañ wurusu ngalam la. Dara du ca xaaalis, ndax xaaalis tekkeetul woon dara ca jamonoy Suleymaan. ²² Te sax ay gaali géej yu mag la Buur amoon, yu doon ànd ak gaali Iram, ñetti at yu nekk gaal ya yeb wurus ak xaaalis ak bëñi ñay, ak ay golo ak i dàngin.

²³ Buur Suleymaan moo gēnoona mǎgg buur yi ci kaw suuf yépp, muy ci alal di ci xel mu rafet. ²⁴ Mboolem waa àddina dañu daan wuta giseek Suleymaan, ngir taataansi xelam mu rafet mi ko Yàlla xelal. ²⁵ At mu jotaa, ku nekk di ko indil sab teraanga, muy ay juntuukaayi wurus ak yu xaaalis ak i mbubb ak i gannaay ak i cuuraay ak i fas ak i berkelle.

²⁶ Suleymaan dajale watiir yaak fas ya, muy junni ak ñeenti téeméeri watiir (1 400), ak fukki junniy fas ak ñaar (12 000) yu mu denc ca dëkk ya watiir ya féete, ak ca Yerusalem ga mu nekk. ²⁷ Noonu Buur lateel xaaalis ci Yerusalem ba muy saf i doj, garabi seedar yi ne xas ni garabi sikomoor yi late ci joor gi. ²⁸ Ña nga daan jēggaani fasi Suleymaan ca réewum Misra ak Silisi^o, ay baana-baanay buur di léen fa jēnde. ²⁹ Benn watiir bu ñu jēnde Misra, doon léen dikke juróom benni téeméeri dogi xaaalis (600), aw fas di téeméer ak juróom fukki dogi xaaalis (150). Ñu di ca indaaleel mboolem buuri Etteen ñaak buuri Siri.

Suleymaan moy na

11 ¹ Ci biir loolu Buur Suleymaan bēggoon na jigéeni yeneen xeet yu bare te borkul ak doomu Firawna ji mu jēloon: ñuy ay jigéeni Mowabeen

^o 10.28 *Silisi* mooy Kewe ba tey.

ak jigéeni Amoneen ak jigéeni Edomeen ak jigéeni waa Sidon ak jigéeni Etteen. ² Ñooñu bokk ci xeet, yi Aji Sax ji waxoon °bànni Israyil ne léen: «Buleen jéli jabar ci ñoom, ñoom it buñu takksi ci yéen ndax kon dinañu léen dëpp, ngeen topp seeni tuur.» Waaye Suleymaan bëgg léen, taq léen. ³ Mu denc ca juróom ñaar téeméeri lingeer (700) ak ñetti téeméeri (300) nekkaale. Soxnaam ya nag dëpp ko.

⁴ Ba Suleymaan demee ba màggat, ay soxnaam xiir ko ci topp yeneen yàlla, ba wéetalul Yàllaam Aji Sax ji, na ko Daawuda, baayam wéetale woon. ⁵ Ba loolu amee Suleymaan di topp tuur ya ñuy wax Astàrt^p di tuuri waa Sidon, ak Milkom, tuuru Amoneen mu siblu ma. ⁶ Mu def lu ñaaw fi kanam Aji Sax ji. Suleymaan jeexul woon ci Aji Sax ji, na baayam Daawuda jeexe woon ci moom. ⁷ Ci biir loolu Suleymaan tabaxal Kemos, tuuru Mowab mu siblu ma, ab °bérabu màggalukaay ca kaw tund wa féete Yerusalem penku. Mu tabaxaleel ca Moleg^q, tuur mu siblu ma Amoneen ñay jaamu. ⁸ Mu defal noonu mboolem soxnaam ya xeetoo feneen, ñuy taalal seeni tuur cuuraay, di léen rendil ay sarax.

⁹ Aji Sax ji nag mere Suleymaan ndax la mu ko dëddu, moom Aji Sax ji, Yàllay Israyil ji ko feeñu woon ñaari yoon. ¹⁰ Dafa santoon Suleymaan ci mbir moomu, ne ko bumu topp tuuri yeneen xeet yi. Waaye deful li ko Aji Sax ji santoon. ¹¹ Aji Sax ji ne Suleymaan: «Gannaaw nii nga defe, sàmmoo sama °kóllère, sàmmoo sama dogal yi ma la tegoon, dinaa foqatee nguur gi ci say loxo, jox ko sab surga. ¹² Waaye дума ko def ci sag dund ngir sa baay Daawuda. Ci sa loxol doom ju góor laa koy foqatee. ¹³ Te ba tey du nguur gépp laay foqati. Dinaa bàyyee sa doom genn giir ngir Daawuda sama jaam ba ak Yerusalem gi ma tànn.»

^p 11.5 **Astàrt** tuur mu jigéen la woon bu ay xeeti penku daan jaamu. Ñu yaakaaroon ne dina léen may, ñu jur doom yu bare, seeni jur ak seeni tool it, lépp nangu ba bare. Ñu jàppoon ne Astàrt mooy jabaru tuur ma ñu naan Baal.

^q 11.7 **Moleg** ak Milkom jàpp nañu ne benn la.

Ay noon jógal nañu Suleymaan

¹⁴ Ba mu ko defee Aji Sax ji gemb ab noon bu jógal Suleymaan. Muy Adàdd, Edomeen ba askanoo ca buuru Edom. ¹⁵ Ba Daawuda di xareek waa Edom te Yowab njiital xareem demoon di suuli néew ya, Daawuda daa reyoon góori Edomeen ña ñépp. ¹⁶ Yowab ak Israyil gépp toog fa juróom benni weer, ba keroog ñu rey góori Edomeen ñépp. ¹⁷ Ci biir loolu Adàdd ànd ak ay Edomeen ñu bokkoon ci dagi baayam, daldi daw jëm Misra. Booba Adàdd xale bu góor bu ndaw la woon. ¹⁸ Ñu jóge Majan, dem Paran, ànd ak ay waa Paran dem Misra, ca Firawna buuru Misra. Firawna jox Adàdd suuf, may ko kër ak ub dund. ¹⁹ Firawna dafa béggoon Adàdd lool, ba may ko jabar rakki Lingeer Tapenes, jabari boppam. ²⁰ Rakki Tapenes ja am ak Adàdd doom ju góor, di Genubat; Tapenes yor ko ca biir kër Firawna, Genubat nekk ak doomi Firawna, ca biir kër Firawna. ²¹ Ci kaw loolu Adàdd dégge fa mu nekk ca Misra ne Daawuda nelaw na, fekki ay maamam, te Yowab njiital xare la it dee na. Adàdd ne Firawna: «Yiwi ma, ma dellu sama réew.» ²² Firawna ne ko: «Ana loo ñàkk fii ci man, ba bégga dellu nii sam réew?» Adàdd ne ko: «Du dara sax de, xanaa bégg rekk, nga yiwi ma, ma dem.»

²³ Yàlla dellu gemb ab noon bu jógal Suleymaan. Muy Reson doomu Eliyada ma dawee woon ca Adadeser buuru Soba, sangam ba. ²⁴ Mu boole ay farandoom, ànd ak ñoom, jiite léen gannaaw ba Daawuda faagaagalee xarekati sangam. Ñu dem sanc Damas, moom ko. ²⁵ Reson nag dafa noonoo woon Israyil diir ba Suleymaan di dund, dolli ca la léen Adàdd lëjal. Noonu Reson falu ca Siri, di bañaaleb Israyil.

²⁶ Keneen ku jógal Buur Suleymaan di Yerbowam doomu Nebat, Efrayimeen bu dëkk Cereda, ndeyam tudd Ceruya, dib jëtun. Ma nga bokkoon ca jawriñi Suleymaan. ²⁷ Ni mu jógale Buur nii la: Suleymaan da doon yékkati sèkkub Milo ba^r, di fatt tatay gox ba ñu naan Kër Daawuda miy baayam. ²⁸ Booba Yerbowam xalelu góor bu jàmbaare la woon. Suleymaan jot koo nemmiku ci

^r **11.27 Milo** xur la wu doxoon diggante kër Yàlla ga ak gox ba ñu naan Kër Daawuda. Suleymaan sèkklu ko.

biir liggéeyam, ba tax mu tabb ko ca kaw mboolem liggéeykati sañul-bañ, ya askanoo ca Yuusufa.

²⁹ Mu am bés Yerbowam doon génne Yerusalem. Axiya, yonent bu dëkk Silo ba, dajeeq moom ca yoon wa. Ma nga sol mbubb mu bees. Ñoom ñaar rekk ci àll bi. ³⁰ Axiya daldi jàpp ci mbubb mu bees mi mu sol, ne ko tareet, dagg ko fukki dog ak ñaar. ³¹ Mu ne Yerbowam: «Jëlalal fii sa bopp fukki dog, ndax Aji Sax ji Yàllay Israyil da ne: “Gisal, maa ngi dagge nguur gi ci loxol Suleymaan, te dinaa la ci jox fukki giir. ³² Waaye genn giir gi Suleymaan a koy moom ngir Daawuda sama jaam ba, ak Yerusalem, dëkk ba ma tannée ci mboolem giiri Israyil. ³³ Li ko waral mooy dañu maa dëddu, di jaamu °Astàrt, tuur mu jigéen mu waa Sidon di jaamu, ak Kemos, tuuru Mowabeen ñi, ak Milkom, tuuru Amoneen ñi. Daño baña topp samay yoon, baña def li ma rafetlu, di sàmm samay dogal ak sama àttey yoon, na ko Daawuda baayu Suleymaan daa defe. ³⁴ Waaye дума jële nguur gépp ci loxoom, ndaxte dama koo def njiit giiru dundam gépp ngir Daawuda sama jaam ba ma tànnal sama bopp, te mu doon jëfe samay santaane ak samay dogal. ³⁵ Du tee ma nangoo nguur gi ci loxol doomam ju góor, jox la ci fukki giir. ³⁶ Doomam nag dinaa ko jox genn giir gi ci des, ngir askanu Daawuda, sama jaam ba, baña fey mukkk sama kanam ci biir Yerusalem, dëkk bi ma tànnal sama bopp, dëel fa sama tur. ³⁷ Yaw dinaa la jël, def la nga jiite fépp foo bëgg, di buuru Israyil. ³⁸ Te soo defee mboolem li ma la sant, topp samay yoon, di def li ma rafetlu tey jëfe samay dogal ak samay santaane, na ko Daawuda sama jaam ba daa defe, su boobaa dinaa ànd ak yaw te dinaa la sampal kër gu sax, ni ma ko sampale woon Daawuda, te dinaa la jox Israyil. ³⁹ Kon dinaa torxal askanu Daawuda waaye du doon ba fàww.”»

⁴⁰ Ba mu ko defee Suleymaan di fexee rey Yerbowam; Yerbowam daw ba Misra, fa Sisag buuru Misra. Mu toog foofa ca Misra, ba Suleymaan nelaw.

Suleymaan nelaw na

⁴¹ Li des ci mbiri Suleymaan ak mboolem lu mu def ak lu jëm ci xelam mu rafet, bindees na lépp moos ca téere ba ñu dippee Jaloorey Suleymaan.

⁴² Suleymaan falu na ca Israyil gépp diiru ñeent fukki at, péeyoo Yerusalem.

⁴³ Gannaaw loolu Suleymaan nelaw, fekki ay maamam, ñu denc ko ca gox ba ñu naan Kër Daawuda, miy baayam. Doomam Robowam falu, wuutu ko.

Réew ma xàjjalikoo na

(Saar 12.1---22.54)

Israyil jàmbo na Robowam

12 ¹ Ba loolu amee Robowam dem dëkk ba ñuy wax Sisem, fekk Israyil gépp daje fa, ngir fal ko buur. ² Yerbowam doomu Nebat dégge ko ca Misra ga mu dawoon dem, di fa làqu Buur Suleymaan, te toogoon fa ba booba. ³ Ñu woolu ko, mu ànd ak mbooloom Israyil gépp, dem ca Robowam, ne ko: ⁴ «Sa baay da noo tegoon njaam gu metti. Yaw nag dangay yolomal sunu njaam gii te woyofalal nu sunu yen bu diis bi mu nu teg. Kon dinanu la jaamu.» ⁵ Mu ne léen: «Demleen ba mu am ñetti fan, ngeen délsi.» Mbooloo ma dem.

⁶ Buur Robowam giseek mag ña daa digal baayam Suleymaan cig dundam. Mu ne léen: «Lu ngeen may digal, ma wax ko mbooloo mii?» ⁷ Ñu ne ko: «Boo nangulee mbooloo mii tey, nekkal léen, wax léen kàddu yu rafet, dinañu la nangu ba fàww.»

⁸ Waaye Robowam dégluwul waxi mag ña, xanaa dem giseek xale yu góor, yi mu yaroondool te di ko taxawu. ⁹ Mu ne léen: «Mbooloo mii da maa wax ne ma, ma woyofalal léen njaam gi léen sama baay tegoon. Lu ngeen may digal, ma wax léen ko?»

¹⁰ Xale yu góor ya mu yaroondool wax ko ne ko: «Mbooloo mii ne la sa baay da léena tegoon njaam gu metti, waaye yaw yolomalal léen ko; li nga léen di wax mooy lii: “Sama baaraamu sanqleeñ moo gëna diis sama tànku baay.

¹¹ Sama baay da leena tegoon njaam gu metti, waaye man dinaa ko yokk, ba mu gëna metti. Te sama baay da leen daa dóor ay yar, waaye man dinaa leen cawe ay leraw yu ñu kor weñ.»

¹² Ca gannaaw ëllëg sa Yerbowam ànd ak mbooloo ma mépp, dellu ca Robowam, muy la léen Buur Robowam waxoon, ne léen ñu dem ba mu am ñetti fan, ñu délsi. ¹³ Buur wax mbooloo ma kàddu gu ñagas googa, baña déglu la ko mag ña digaloon. ¹⁴ Daa waxeek ñoom na ko xale yu góor ya digale woon, ne léen: «Sama baay da leena tegoon njaam gu metti, waaye man dinaa ko yokk, mu gëna metti. Te sama baay da leen daa dóor ay yar, waaye man dinaa leen cawe ay leraw yu ñu kor weñ.» ¹⁵ Noonu Buur tanqamlu mbooloo ma. Booba Aji Sax ji moo walbati mbir ma, ngir amal wax, ja mu waxoon Yerbowam doomu Nebat, Axiya waa Silo ba jottali.

¹⁶ Ba Israyil gépp gisee ni léen Buur tanqamloo, ñu léeb ko ne ko:

«Ana lu nu bokk ak Daawuda,

lu nu séq ak doomu Yese?

°Bànni Israyiloo, coww ca seeni xayma!

Yaw askanu Daawuda, xoolalal sa bopp sa kër.»

Ba mu ko defee bànni Israyil ñibbi; ¹⁷ waaye bànni Israyil ya dëkkoon ca dëkki Yuda, Robowam jiite léen, di seen buur. ¹⁸ Buur Robowam yónni Adoram may sase liggéeyi sañul-bañ ya, waaye Israyil gépp bokk dóor ko ay doj ba mu dee. Buur Robowam nag gaaw war watiir, daw làquji Yerusalem. ¹⁹ Noonu la Israyil fippoo, dëddu waa kër Daawuda ba sunu jonni yàllay tey.

²⁰ Ci biir loolu Israyil gépp dégg ne Yerbowam délsi na; ñu woote ndaje, woo ko ca, fal ko buuru Israyil gépp. Kenn farul ak waa kër Daawuda, lu moy waa giiru Yuda donḡ.

²¹ Ci kaw loolu Robowam agsi Yerusalem, daldi woo waa kër Yuda gépp, ñook giiru Beñamin. Ñu toll ci téeméer ak juróom ñett fukki junniy nit (180 000), diy ñeyi xare. Ñu nara xareek Israyil, ngir delloo léen ci nguuru Robowam doomu Suleyman.

²² Waaye kàddug Yàlla dikkal góoru Yàlla gu ñuy wax Semaya. Mu ne ko:
²³ «Waxal Robowam doomu Suleymaan buuru Yuda, te wax waa kër Yudaak Beñamin ak mbooloo ma ca des ne léen: ²⁴ «Aji Sax ji dafa ne: Buleen jóg di xeex ak seen bokki bànni Israyil. Na ku nekk ñibbi këram, ndaxte ci man la mbir mii sababoo.»» Ñu dégg kàddug Aji Sax ji, walbatiku dem, muy la Aji Sax ji santaane.

Buuru Israyil bokkaale na

²⁵ Gannaaw loolu Yerbowam tabaxaat Sisem, dëkk ba ca diiwaanu tundi Efrayim, daldi fay dëkk. Mu jógé foofa tabaxaat dëkk ba ñuy wax Peniyel.
²⁶ Yerbowam nag di wax ca xelam naa: «Léegi nguur gi dellu ci loxol waa kër Daawuda. ²⁷ Bu mbooloo mii demee di sarxali ca kër Aji Sax ji ca Yerusalem, seen xol dina walbatiku ne napp ca seen sang, Robowam buuru Yuda. Su ko defee ñu rey ma, dellu ca Robowam buuru Yuda.»

²⁸ Noonu Buur seetluwaat mbir ma, daldi sàkklu ñaari wëlluy wurus. Mu ne mbooloo ma: «Yéen waa Israyil, bare ngeen lu ngeen di jaabante yoonu Yerusalem. Xool-leen fii kay! Seen yàlla ya leen génne woon réewum Misraa ngi.» ²⁹ Ba loolu amee mu teg wenn wëllu wa ca dëkk ba ñuy wax Betel, wa ca des mu tegi ko ca Dan. ³⁰ Mbir moomu doon bàkkaar. Mbooloo ma dox jiitu wenn wëllu wa, ba àgg Dan. ³¹ Ci kaw loolu Yerbowam tabax ay °béra bi màggalukaay, ba noppi tabb ay °sarxalkat ci baadoolo yu bokkul ci askanu °Lewi.

³² Ba mu ko defee Yerbowam dogal màggalug fukki fan ak juróom ca weeru juróom ñetteel wa. Mu mel ni màggal gay am Yuda. Yerbowam rendi ay sarax ca °sarxalukaay ba. Noonu la def Betel, rendil fa wëllu ya mu defarlu woon, defal ko wëllu ya sarax. Ci biir loolu mu tabb ca Betel ay sarxalkat ngir béra bi màggalukaay yooyu mu sos. ³³ Nii la rendee ay sarax ca kaw sarxalukaay ba mu sàkklu ca Betel, ca fukki fan ak juróom ca weeru juróom ñetteel wa, muy weer wu mu tànnal boppam. Ba mu ko defee mu dogalal waa Israyil màggal googu, daldi yéeg ca kaw sarxalukaay ba, ngir taal fa sarax su ñuy lakk.

Nitu Yàlla àddu na ca Betel

13 ¹Yàlla-woo-yàlla, genn góoru Yàlla jóge Yuda, dikk ba Betel ci ndigalal Aji Sax ji, fekk Yerbowam taxaw ca °sarxalukaay ba, nara taal sarax su ñuy lakk. ²Góor ga xaacu, gëdd sarxalukaay ba ci ndigalal Aji Sax ji, daldi ne: «Yaw sarxalukaay bi, éey sarxalukaay bii! Aji Sax ji dafa wax ne: “Xamal ne doom ju góor dina juddoo kër Daawuda, Yosiya lay tudd. Dina rendi ci sa kaw °sarxalkati °bérabí m̀aggalukaay yiy sarxal ci sa kaw. Yaxi nit lañuy lakk ci sa kaw.”» ³Góor ga joxe na ca bésú keroog ab takk; mu ne: «Takk bii la ci Aji Sax ji biral: “Seetluleen, sarxalukaay bi dina xar ñaar, dóom bi ci kaw sottiku.”»

⁴Naka la Buur Yerbowam dégg na góoru Yàlla ga xaaco, gëdd sarxalukaayu Betel ba, mu daldi koy tàllal loxoom, foofa ca sarxalukaay ba. Mu ne: «Jàppleen ko!» Waaye loxo ba mu ko tàllal ne kàdd, manatu koo bank. ⁵Sarxalukaay ba xar ñaar, dóom ba tuuroo ca sarxalukaay ba, ne wàww. Muy takk ba góoru Yàlla ga joxe woon ci ndigalal Aji Sax ji. ⁶Buur ne góoru Yàlla ga: «Rikk tinul ma sa Yàlla Aji Sax ji te ñaanal ma, sama loxo mana banku.» Góoru Yàlla ga tinul Buur Aji Sax ji, loxoom bankuwaat, mel na mu meloon.

⁷Ci kaw loolu Buur wax góoru Yàlla ga ne ko: «Ñëwal nu dem kër ga, nga xéewlu, ba noppi ma am lu ma la may.» ⁸Waaye góoru Yàlla ga ne Buur: «Soo ma joxoon sa genn-wàllu kër sax, дума ànd ak yaw te дума sex dugub it mbaa may naan um ndox ci bii bérab, ⁹ndax loolu lañu ma sant ci ndigalal Aji Sax ji, ne ma: “Bul sex dugub, bul naan um ndox te bul walbatiku jaare yoon wa nga jaare woon bi ngay ñëw.”» ¹⁰Noonu góor ga awe feneen, waaye walbatikuwul aw fa mu awoon ba muy dikk Betel.

Ab yonent nattu na moroomam

¹¹Booba ab yonent bu m̀aggat a nga woon ca Betel. Ay doomam yu góor dikk. Kenn ci ñoom nettli ko mboolem la góoru Yàlla ga def bésú keroog ca

Betel ak la mu wax Buur. Ñu yegge ko seen baay. ¹² Seen baay laaj léen ne léen: «Ana yoon wu mu jaare?» Fekk na doomam yu góor ya gisoon nañu fa góoru Yàlla ga jaare woon, bàyyikoo Yuda. Ñu wax ko. ¹³ Mu ne léen: «Takkal-leen ma mbaam mi.» Ñu takkal ko mbaam ma, mu war, ¹⁴ toppi góoru Yàlla ga, fekk ko ci genn ker garabu terebent. Mu ne ko: «Yaa di góoru Yàlla gi jóge Yuda?» Mu ne ko: «Waaw.» ¹⁵ Mu ne ko: «Kaay, nu dem kër ga, nga sex dugub, boog.» ¹⁶ Mu ne ko: «Duma mana walbatiku ànd ak yaw, manumaa sex dugub it mbaa may bokk ak yaw ndoxum naan ci bii bérab. ¹⁷ Ndaxte dañu maa wax ci ndigalal Aji Sax ji ne ma: “Bu fa sex dugub, bu fa naan um ndox te bul walbatiku jaare yoon wa nga jaare woon bi ngay ñëw.”» ¹⁸ Mu dellu ne ko: «Man itam yonent laa ni yaw. Malaaka wax na ma ci ndigalal Aji Sax ji ne ma: “Wañni ko, mu ànd ak yaw sa kër, sex dugub, naan ndox.”» Fekk na la muy wax amul. ¹⁹ Mu walbatiku ànd ak moom ca kër ga, sex fa dugub, naan fa ndox.

²⁰ Noonu ñu toog ca ndab la, kàddug Aji Sax ji dikkal yonent ba wañni góoru Yàlla ga. ²¹ Mu àddu ca kaw ne góoru Yàlla ga jóge Yuda: «Aji Sax ji dafa wax ne: Gannaaw tebbi nga waxi Aji Sax ji te defoo li la sa Yàlla Aji Sax ji sant, ²² xanaa walbatiku di sex dugub, di naan ndox ci bérab bi mu la waxoon ne la bu fi sex dugub, bu fi naan ndox, sab néew du fekki say maam ca seen bàmmeeel.» ²³ Ba góoru Yàlla ga sexee dugub ba naan ndox, yonent ba ko wañni woon takkal ko mbaam ma. ²⁴ Mu dem, gaynde dogale ko, rey ko, néewam ne lareet ca yoon wa, mbaam maak gaynde ga taxaw ca wet ga. ²⁵ Naka la ay nit jaare foofa, séenuñu lu moy néew ba ne lareet ca yoon wa, gaynde ga taxaw ca wet ga. Ñu dem yegge ko waa dëkk, ba yonent bu mąggat ba dëkkoon.

²⁶ Yonent booba ko wañni woon ca yoon wa nag dégg ko ne: «Góoru Yàlla gaa! Ka tebbi woon waxi Aji Sax ji, Aji Sax ji boole kook gaynde gi, mu fàdd ko, rey ko. Moom la ko kàddug Aji Sax ji waxoon.» ²⁷ Mu ne doom ya: «Takkal-leen ma mbaam mi.» Ñu takkal ko. ²⁸ Mu dem fekk néew ba ne lareet ca yoon wa, mbaam maak gaynde ga taxaw ca wet ga. Gaynde ga lekkul néew

ba, fàddul mbaam ma. ²⁹ Yonent ba yékkati néewu góoru Yàlla ga, teg ko ca kaw mbaam ma, delloosi ko. Noonu yonent bu màggat ba ñibbi dëkkam ngir rob ko, jooy ko. ³⁰ Mu denc néew ba ca bàmmeeleu boppam. Ñu di ko jooy, naan: «Wóoy sunu mbokk ma!» ³¹ Gannaaw ba ñu ko robee, mu wax doomam yu góor ya ne léen: «Bu ma faatoo, nangeen ma rob ci bàmmeel bii ñu denc góoru Yàlla gi. Fi weti yaxam ngeen di tëral samay yax. ³² Ndaxte li wér te wóor déy, wax ji mu jottali ci ndigalal Aji Sax ji, ba muy gëdd °sarxalukaayu Betel bi ak mboolem °béraabi màggalukaay yi ci dëkki Samari, wax jooju dina am.»

³³ Gannaaw loolu Yerbowam dëppul yoonam wu bon wa mu topp. Dafa dellu tabb ci biir baadoolo yi ay °sarxalkat ngir béraabi màggalukaay ya. Ku bëgg rekk mu tabb la, ngay sarxalkat ca béraabi màggalukaay ya. ³⁴ Loolu nag di bàkkaar bu réy ci biir kër Yerbowam, ba tax askanam daanu, ba raaf fi kaw suuf.

Aw tiis dikkal na Yerbowam

14 ¹ Ca yooyu jamono Axiya doomu Yerbowam ju góor wopp.

² Yerbowam wax soxnaam, ne ko: «Ayca, doxal soppiji col, ba kenn du xam ne sama soxna nga, te nga dem Silo. Dama ne, Axiya yonent baa nga fa. Moo ma waxoon ne ma dinaa falu buur, jiite mbooloo mii. ³ Yóbbaaaleel fukki mburu ak nàkk yu ndaw ak taxub lem te nga dem ca moom. Moom dina la wax nan la mbiri gone gii di deme.» ⁴ Soxnas Yerbowam def noona, daldi dem Silo, agsi kër Axiya.

Booba Axiya gisatul. Bët ya daa muuru ndax màggat. ⁵ Waaye fekk na Aji Sax ji wax Axiya, ne ko: «Dama ne, soxnas Yerbowam a ngi ñëw di leerlusi mbirum doomam ju góor ci yaw, ndax dafa wopp. Bu dikkee keneen lay mbubboo.» Aji Sax ji ne Axiya, mu wax ko nàngam ak nàngam.

⁶ Ba loolu amee Axiya dégg t ànki ndaw sa ca bunt ba. Mu ne ko: «Soxnas Yerbowam, agsil! Ana looy mbubboo keneen nii? Man de yóbbante nañu ma ci yaw xibaar bu tiis. ⁷ Demal ne Yerbowam: “Aji Sax ji, Yàllay Israyil dafa

wax ne: Dama laa yékkati ci biir mbooloo mi, fal la nga jiite Israyil sama mbooloo. ⁸ Damaa foqatee nguur gi ci loxol waa kër Daawuda, jox la ko. Waaye meloo ni Daawuda, sama jaam ba daan jëfe samay santaane, wéetal ma ci xolam, du def lu moy lu ma rafetlu. ⁹ Def nga musiba, ba raw mboolem ñu la jiitu, dem di sàkkal sa bopp yeneen yàlla ak tuur yu ñu móole weñ, ba sama xol fees. Man mii nga xalab, dëddu ma. ¹⁰ Moo tax дума def lu moy wàcce musiba ci kër Yerbowam.

Dinaa faagaagal ku mana taxaw, colol, te bokk ci Yerbowam,
ba ci ku gëna néew doole te tumurànke fi digg Israyil.

Dinaa buub kër Yerbowam, sànni,
ni ñuy buubee neefare, ba mu jeex tàkk.

¹¹ Ku Yerbowam deele ci dëkk bi, xaj yi lekk;
ku ca médd ca àll ba, njanaaw ya for.

Aji Sax ji wax na ko.”

¹² «Yaw nag jógal ñibbi sa kër. Booy teg sa tànk ca biir dëkk ba rekk, gone gi dee. ¹³ Israyil gépp dinañu ko jooy. Kooku rekk déy lees di denc ci bàmmeel, ci ku bokk ci Yerbowam, ngir ci moom donj la Aji Sax ji Yàllay Israyil gis lu baax, ci waa kër Yerbowam. ¹⁴ Aji Sax ji dina falal boppam buur bu jiite Israyil, te kooku dina faagaagal waa kër Yerbowam. Bés bi taxaw na jeeg! Ana lu ciy topp? ¹⁵ Aji Sax ji dina fàdd Israyil. Dinañu mel ni gattax guy foy-foyi cim ndox. Dina déjjatee Israyil ci suuf su baax sii mu joxoon seeni maam, tasaare léen ca wàllaa dexu Efraat, ndax dañoo samp ay xer yu ñuy jaamoo °Asera, di merloo Aji Sax ji. ¹⁶ Aji Sax ji dina wacc Israyil ndax bàkkaarri Yerbowam yi mu bàkkaar te di ko bàkkaarloo Israyil.»

¹⁷ Ba loolu amee soxnas Yerbowam jóg, bàyyikoo fa, ba àgg Tirsa. Naka la agsi ca bunt kër ba, xale ba dee. ¹⁸ Ñu rob ko, Israyil gépp jooy ko, muy la Aji Sax ji waxoon, yonent Yàlla Axiya jaamam ba jottali.

¹⁹ Li des ci mbiri Yerbowam, ay xareem ak na nguuram deme woon, bindees na lépp moos ca téere ba ñu dippee Jaloorey buuri Israyil ca seeni jant. ²⁰ At

ya Yerbowam falu buur ñaar fukki at la ak ñaar. Gannaaw loolu mu saay, fekki ay maamam. Nadab doomam falu, wuutu ko.

Robowam falu na ca Yuda

²¹ Robowam doomu Suleymaan moo doon buuru Yuda. Amoon na ñeent fukki at ak benn ba muy falu. Fukki at ak juróom ñaar la péeyoo Yerusalem, dëkk ba Aji Sax ji tànn ci mboolem giiri Israyil, dëël fa turam. Ndeyam di Naama, dib Amoneen. ²² Waa Yuda nag di def li Aji Sax ji ñaawlu, ba di ko fiirloo fiiraange gu raw ga ko seen maam daa fiirloo ndax seen bàkkaar. ²³ Dañoò sàkkal seen bopp ay °béraabi màggalukaay, samp ay tuuri doj ak i xer yu ñuy jaamoo °Asera ca kaw mboolem tund wu kawe mbaa ker garab gu naat. ²⁴ Réew ma amoon na sax ñuy jaay seen bopp fa ñuy màggale tuur ya. Ñuy def mboolem ñaawteefi xeet ya Aji Sax ji dàqoon ngir °bànni Israyil.

²⁵ Ba Buur Robowam faloo, ba dugg ci juróomeelu atu nguuram, Sisag buuru Misra song Yerusalem. ²⁶ Mu yóbbu alali kër Aji Sax ji ak alali kër Buur, jël lépp ba ca mboolem pakki wurus ya Suleymaan defarlu woon. ²⁷ Buur Robowam defarlu ay pakku xàñjar, wuutal fa. Mu teg ko ca loxoy njiiti dag yay wattu buntu kër Buur. ²⁸ Noonu saa yu Buur dee duggsi ca kër Aji Sax ji, dag ya ñàbb pakk ya, bu ñu noppee delloo ko ca néegu dag ya.

²⁹ Li des ci mbiri Robowam ak mboolem la mu def, bindees na ko moos ca téere ba ñu dippee Jaloorey buuri Yuda ca seeni jant. ³⁰ Xare masula dakk diggante Robowam ak Yerbowam. ³¹ Gannaaw gi Buur Robowam saay, fekki ay maamam, ñu denc ko ca bàmmeeelu maamam ya ca gox ba ñu naan Kër Daawuda. Ndeyam a doon Naama, dib Amoneen. Doomam Abiyam moo falu buur, wuutu ko.

Abiyam falu na ca Yuda

15 ¹ Ba Yerbowam doomu Nebat faloo Israyil, ba dugg fukkeelu atu nguuram ak juróom ñett, ca la Abiyam falu buur, jiite Yuda. ² Ñetti at

la Buur Abiyam péeyoo Yerusalem. Maaka doomu Abisalom^s moo doon ndeyam. ³ Muy roy nag baayam ca mboolem bàkkaar ya mu daan def. Te it wéetalul woon Yàllaam Aji Sax ji ni maamam Daawuda. ⁴ Terewul Daawuda tax Aji Sax ji Yàllaam may ko doom ju góor ju koy wuutu ca Yerusalem, ndax askanu Daawuda baña fey, Yerusalem it mana ñoŋ. ⁵ Li ko waral mooy Daawuda da daan jéfe njub lu Aji Sax ji rafetlu, te giiru dundam gépp teggiwul lenn lu ko Aji Sax ji sant lu moy ci mbirum Uri Etteen ba.^t ⁶ Xare masula dakk diggante waa kër Robowam ak Yerbowam giiru dundu Abiyam gépp.

⁷ Li des ci mbiri Abiyam ak mboolem lu mu def, bindees na ko moos ca téere ba ñu dippee Jaloorey buuri Yuda ca seeni jant. Xare it jiboon na diggante Abiyam ak Yerbowam. ⁸ Gannaaw gi Buur Abiyam saay, fekki ay maamam, ñu denc ko ca gox ba ñu naan Kër Daawuda. Asa doomam falu buur, wuutu ko.

Asa falu na ca Yuda

⁹ Ba Buur Yerbowam faloo Israyil, ba dugg ñaar fukkeelu atu nguuram, ca la Asa falu buur, jiite Yuda. ¹⁰ Ñeent fukki at ak benn la Buur Asa péeyoo Yerusalem. Maaka doomu Abisalom ju jigéen moo doon maamam. ¹¹ Asa nag di def njub lu Aji Sax ji rafetlu, na maamam Daawuda daa def. ¹² Dàqe na ca réew ma ñu daan jaay seen bopp fa ñuy màggale tuur ya. Mu jële ca réew ma kasaray tuur ya fa ay maamam defoon yépp. ¹³ Maaka maamam sax, Asa xañ na ko céru lingeer yaayi buur ba mu amoon, ndax Maaka daa sàkkaloon tuur ma tudd °Asera ab xer wu siblu wu ñu koy màggale. Asa gor xeru maamam ja, lakk ko ca xuru Sedoron. ¹⁴ Waaye °béraabi màggalukaay ya, jëleesu ko fa. Lu ko moy Asa wéetal na Aji Sax ji giiru dundam gépp. ¹⁵ Noonu mu indi ca kër Aji Sax ji yéf ya baayam sellalaloon Aji Sax ji, booleek la mu sellalal Aji Sax ji moom ci boppam, muy xalis ak wurus ak i ndab.

^s **15.2 *Abisalom*** ak Absalom jàpp nañu ne kenn ki la.

^t **15.5** Seetal ci 2. Samiyel 11.

¹⁶ Xare nag masula dakk diggante Asa ak Basa buuru Israyil seen giiru dund gépp. ¹⁷ Ci biir loolu Basa buuru Israyil song Yuda, tabax dëkk ba ñuy wax Rama^u, ba kenn du dugg jëm ca Asa buuru Yuda mbaa muy génn. ¹⁸ Asa dajale mboolem luy xalis mbaa wurus wu desoon ca denci kër Aji Sax ji ak denci kër Buur. Mu teg ko ci loxoy jawriñam ya, ba noppi yebal léen ca Buur Ben Addàd. Ben Addàd, Tabrimon ay baayam. Tabrimon, Esiyon ma ca Damas, buuru Siri, mooy baayam.

Noonu Asa ne Ben Addàd: ¹⁹ «Kóllëree ngi sama digganteek yaw, na mu doxe woon sama diggante baay ak sa baay. Lii nag xalis la ak wurus, may naa la ko. Te nga dogoo rekk ak Basa buuru Israyil, ndax mu jóge sama réew.» ²⁰ Ben Addàd déggal Buur Asa, yebal njiiti xareem ca dëkki Israyil. Ni la nangoo dëkk ya ñuy wax Yon ak Dan ak Abel Bet Maaka ak diiwaanu Kineret gépp, boole ca diiwaanu Neftali gépp. ²¹ Basa dégg ko, ba tax mu bàyyi Rama ga mu doon tabax ab tata, daldi dem toogi Tirsa.

²² Ba loolu amee Buur Asa joxe ndigal, woolu waa Yuda gépp, kenn desul. Ñu ànd jëleji ca Rama doj yaak bant ya Basa doon tabaxe. Buur Asa tabax ca dëkk ba ñuy wax Geba gu giiru Beñamin, tabax ca Mispa.

²³ Li des ci mbiri Asa ak mboolem njàmbaraam ak la mu def yépp ak dëkk ya mu tabax, bindees na lépp moos ca téere ba ñu dippee Jaloorey buuri Yuda ca seeni jant. Ba Asa demee ba màggat nag, amoon na jàngoroy tànk. ²⁴ Gannaaw gi mu saay, fekki ay maamam, ñu denc ko ca gox ba ñu naan Kër Daawuda miy maamam. Yosafat doomam falu buur, wuutu ko.

Nadab falu na ca Israyil

²⁵ Ba Asa buuru Yuda duggee ñaareelu atu nguuram, ca la Nadab doomu Yerbowam falu buur, jiite Israyil. Nadab jiite na Israyil ñaari at, ²⁶ di jëfe lu Aji Sax ji ñaawlu, aw ci tànk baayam, di bàkkaarloo Israyil. ²⁷ Ci biir loolu doomu Axiya, ji giiroo ci Isakaar te ñu di ko wax Basa, daldi fexeel Nadab,

^u **15.17 Rama** ma nga féete woon Yerusalem bëj-gànnar, toll diggante ñaari réew yi. Mu nekkoon ci kaw tund wu aw yoon jaar, jóge péeyu Israyil, jëm Yerusalem.

jam ko ca Gibeton gu Filisteen ña. Fekk Nadab ànd ak Israyil gépp, gaw Gibeton. ²⁸Noonu Basa rey Nadab, yemook ba Asa buuru Yuda di dugg ñetteelu atu nguuram. Basa falu buur, wuutu Nadab. ²⁹Naka la falu, daldi rey waa kër Yerbowam gépp. Bàyyiwul kenn kuy noyyi te bokk ci Yerbowam. Mu faagaagal léen, muy la Aji Sax ji waxoon, Axiya jaamam ba ca Silo jottali. ³⁰Li ko waral mooy bàkkaari Yerbowam yi mu bàkkaar te bàkkaarloo ko waa Israyil, di merloo Aji Sax ji, Yàllay Israyil, ba feesal xolam.

³¹Li des ci mbiri Nadab ak mboolem lu mu def, bindees na ko moos ca téere ba ñu dippee Jaloorey buuri Israyil ca seeni jant.

³²Xare masula dakk diggante Asa ak Basa buuru Israyil, seen giiru dund gépp.

Basa falu na ca Israyil

³³Ba Asa buuru Yuda duggee ñetteelu atu nguuram, ca la Basa doomu Axiya falu buur ca Israyil gépp, péeyoo Tirsa. Nguuru na ñaar fukki at ak ñeent.

³⁴Da daan def li Aji Sax ji ñaawlu, aw ci tànkì Yerbowam ak bàkkaaram ya mu daan bàkkaarloo Israyil.

16 ¹Gannaaw loolu kàddug Aji Sax ji dikkal Yewu doomu Anani, di rëbb Basa. Mu ne ko: ²«Damaa fekk nga maaseek pëndub suuf, ma yékkati la, jiital la, nga yilif sama mbooloom Israyil mi. Waaye nga aw ci yoonu Yerbowam, di bàkkaarloo sama mbooloom Israyil mi, ba ma mer ndax seeni bàkkaar. ³Kon nag dama ne, dinaa la far, yaw Basa, yaak sa waa kër. Dinaa def sa kër mel ni kër Yerbowam doomu Nebat.

⁴Ku Basa deele ci dëkk bi, xaj yi lekk;

ku médd ca àll ba, njanaaw ya for.»

⁵Li des ci mbiri Basa ak la mu def ak njàmbaraam, bindees na lépp moos ca téere ba ñu dippee Jaloorey buuri Israyil ca seeni jant. ⁶Gannaaw loolu Buur Basa saay, fekki ay maamam, ñu denc ko Tirsa. Ela doomam falu buur, wuutu ko.

⁷ Te itam ba kàddug Aji Sax ji dikkalee yonent Yàlla Yewu doomu Anani ci mbirum Basa ak waa këràm, li ko waral mooy la Basa def lépp, di roy waa kër Yerbowam, Aji Sax ji ñaawlu ko ba xolam fees. Rax-ci-dolli Basa rey waa kër Yerbowam.

Ela falu na ca Israyil

⁸ Ba Asa buuru Yuda duggee ñaar fukkeelu atu nguuram ak juróom benn, ca la Ela doomu Basa falu buur, jiite Israyil. Péeyoo na Tirsà diirub ñaari at.

⁹ Simri, jawriñam ba yilifoon genn-wàllu watiiri xareem, moo ko fexeel. Booba Elaa ngay naan ba màndi ca kër Arsa, ka yor mbiri këràm ca Tirsà.

¹⁰ Simri duggsi, jam ko, mu dee. Loolu yemook ba Asa buuru Yuda di dugg ñaar fukkeelu atu nguuram ak juróom ñaar. Simri falu, wuutu ko. ¹¹ Simri falu ba toog ci jal bi, daldi rey mboolem waa kër Basa. Bàyyiwu ca kuy taxaw, colol; du mbokk, du xarit. ¹² Simri faagaagal waa kër Basa gépp, muy la Aji Sax ji waxoon, ba mu rëbbee Basa, yonent Yàlla Yewu jottali. ¹³ Li ko waral di mboolem bàkkaar yi Basa ak doomam Ela bàkkaar te bàkkaarloo ko Israyil, ba feesal xolu Aji Sax ji Yàllay Israyil ndax seen tuuri neen.

¹⁴ Li des ci mbiri Ela ak mboolem lu mu def, bindees na ko moos ca téere ba ñu dippee Jaloorey buuri Israyil ca seeni jant.

Simri falu na ca Israyil

¹⁵ Ba Asa buuru Yuda duggee ñaar fukkeelu atu nguuram ak juróom ñaar, ca la Simri falu. Mu nguuru diirub juróom ñaari fan ca Tirsà. Booba mbooloom xareem Israyil a nga jógal dëkkub Filisteen ba ñuy wax Gibeton. ¹⁶ Mbooloo ma ca dal ba dégg ñu naan: «Simri de lalal na Buur pexe, ba rey ko.» Israyil gépp daldi fal buur Omri, ma jiite woon mbooloom xarem Israyil. Mu moom Israyil bésub keroog ca dal ba. ¹⁷ Omri ak Israyil gépp bàyyikoo Gibeton, ànd gawi dëkk ba ñuy wax Tirsà. ¹⁸ Ba Simri gisee ne nangu nañu dëkk ba, daa dugg kër Buur, jàll ca biir-a-biir, daldi taal kër ga ca kawam, dee. ¹⁹ Li ko

waral mooy bàkkaar yi mu bàkkaar, di def lu bon lu Aji Sax ji ñaawlu, aw ci tàñki Yerbowam, di bàkkaarloo Israyil.

²⁰ Li des ci mbiri Simri ak pexe ma mu laloon, bindees na lépp moos ca téere ba ñu dippee Jaloorey buuri Israyil ca seeni jant.

²¹ Ba mu ko defee mbooloom Israyil séddalikoo, def ñaari xaaj. Genn-wàllu mbooloo ma topp ca gannaaw Tibni, nar koo fal buur. Tibni nag, Ginat ay baayam. Genn-wàll ga ca des ànd ak Omri. ²² Mbooloom Omri ëpp doole mbooloom Tibni doomu Ginat. Noonu Tibni dee, Omri di buur.

Omri falu na ca Israyil

²³ Ba Asa buuru Yuda duggee fanweereelu atu nguuram ak benn, ca la Omri falu buur, jiite Israyil. Omri nguuru na diiru fukki at ak ñaar. Mu péeyoo Tirsa juróom benni at. ²⁴ Omri nag dem ca Semer jënde ca moom tundu Samari ci juróom ñaar fukki kiloy xalis. Omri tabax ca kaw tund wa, dippee dëkk ba mu tabax Samari, mu dëppook Semer, turu boroom tund wa.

²⁵ Waaye Omri di def lu bon lu Aji Sax ji ñaawlu, ba gëna bàkkaar mboolem ña ko jiitu. ²⁶ Daa aw ci tàñki Yerbowam doomu Nebat ci mboolem lu mu daan def ba ci bàkkaaram bi mu daan bàkkaarloo Israyil, di jógal xolu Aji Sax ji Yállay Israyil ci seen tuuri neen.

²⁷ Li des ci mbiri Omri ak i jëfam ak njàmbaraaram, bindees na lépp moos ca téere ba ñu dippee Jaloorey buuri Israyil ca seeni jant. ²⁸ Buur Omri saay, fekki ay maamam, ñu denc ko ca Samari. Akab doom ja falu buur, wuutu ko.

Akab falu na Israyil

²⁹ Ba Asa buuru Yuda duggee fanweereelu atu nguuram ak juróom ñett, ca la Akab doomu Omri falu, jiite Israyil. Akab doomu Omri nguuru na Israyil ñaar fukki at ak ñaar, péeyoo Samari.

³⁰ Akab doomu Omri di def li Aji Sax ji ñaawlu, ba raw mboolem ña ko jiitu.

³¹ Noonu muy sàlloo bàkkaari Yerbowam doomu Nebat. Loolu doyatatu ko, mu jël jabar Yesabel doomu Etbal, buuru waa Sidon ña. Mu dem bay jaamu seen

tuur mi ñuy wax °Baal, di ko sujjóotal. ³² Mu yékkatil Baal ab °sarxalukaay ca kër Baal, ga mu tabax ca Samari. ³³ Akab teg ca samplu xer wu ñuy jaamoo °Asera. Akab def na lu rawati la mboolem buuri Israyil ya ko jiitu defoon, ba feesal xolu Aji Sax ji, Yàllay Israyil.

³⁴ Ca jamonoy Akab la Iyel ma dëkk Betel tabaxaat Yeriko. Abiram taawam la Iyel ñàkk ba muy tëral kenug tabax ba, teg ca ñàkk Segub, am caatam ba muy taxawal bunti dëkk ba. Mu dëppook kàddug Aji Sax, ja Yosuwe doomu Nuun jottali woon.^v

Yonent Yàlla Ilyaas yégle na bekkoor

17 ¹ Ci kaw loolu yonent Yàlla Ilyaas, ma dëkk Tisbi ga ca Galàdd, wax Akab, ne ko: «Giñ naa ci Aji Sax ji, kiy dund, di Yàllay Israyil ji may jaamu: at yii nu nekk, du taw te du lay, lu moy dama koo wax ci sama làmmiñ.»

² Kàddug Aji Sax ji dikkal Ilyaas ne ko: ³ «Jógeel fii, walbatiku jëm penku, te làquji ca xuru Kerit ca penkub dexu Yurdan. ⁴ Su ko defee, ca ndoxum xur wa ngay naane. Jox naa itam ndigal baaxoñ yi, ñu di la leel foofa.»

⁵ Ilyaas dem, def la Aji Sax ji wax, toogi ca xuru Kerit ca penkub dexu Yurdan. ⁶ Baaxoñ ya di ko indil mburu ak ndawal bëccëg, mburu ak ndawal ngoon, ndox may wal, mu di ca naan.

Ilyaas waar na jëtun ba

⁷ Mu am ay fan, xur wa ñiis, ndax réew ma tawluwul. ⁸ Kàddug Aji Sax ji dikkal ko ne ko: ⁹ «Demal Sarebta ga ca Sidon te toog foofa. Ma ne, sant naa fa ab jëtun, mu may la loo lekk.» ¹⁰ Ilyaas dem Sarebta. Ba mu agsee ca buntu dëkk ba, gisul lu moy ab jëtun buy taxan. Mu woo ko ne ko: «Ngalla may ma tuuti ndox ci njaq li, ma naan.» ¹¹ Mu dem di wuti ndox, Ilyaas dellu ko woo, ne ko: «Rikk sàkkal dogu mburu, yótaale ma.» ¹² Waaye mu ne ko: «Giñ naa ci Aji Sax ji sa Yàlla jiy dund, awma mburu. Awma lu moy barci-loxob sunguf ca

^v 16.34 Seetal ci Yosuwe 6.26.

njaq la ak as diw ca tax ba. Gis nga, may for nii ñetti bant, ba toggi ko, nu lekk, maak sama doom, doora dee ak xiif.»¹³ Ilyaas ne ko: «Bul ragal dara, demal rekk, def ni nga wax. Waaye jëkk ma cee defaral mburu mu ndaw, indil ma, doora defaral sa bopp, yaak sa doom;»¹⁴ ndax Aji Sax ji Yàllay Israyil dafa wax ne: «Njaqub sunguf bi du jeex; taxub diw bi it du jeex, ba keroog Aji Sax ji di taw ci réew mi.»»

¹⁵ Jigéen ja dem, def la ko Ilyaas wax, mook waa këram ñu bokk ak Ilyaas lekk ay fan. ¹⁶ Njaqu sunguf ba jeexul, taxub diw ba jeexul. Muy la Aji Sax ji waxoon, Ilyaas jottali.

Ilyaas ñaanal na doomu jëtun ba

¹⁷ Ba loolu weesoo jigéen, ja dese kër ga, doomam ju góor wopp. Mu mujj metti lool, ba noyyeetul. ¹⁸ Jigéen ja ne Ilyaas: «Éy góoru Yàlla gii! Ana lu ma séq ak yaw? Xanaa dangaa ñëw sullisi sama bàkkaar, ba tax nga rey sama doom ju góor jii?»»

¹⁹ Ilyaas ne ko: «Jox ma sa doom!» Mu jële ko ca loxoy jigéen ja, yóbbu ko ca néeg ba mu dal ca kaw taax ma, tëral ko ca kaw lalam. ²⁰ Ba mu ko defee Ilyaas ñaan ci Aji Sax ji, ne ko: «Éy Aji Sax ji, sama Yàlla, xanaa doo teg jëtun bii ma dalal, naqar wu toll ni, di seetaan doomam ju góor muy dee?»²¹ Noonu mu tëdd, tàlli ñetti yoon ca kaw xale bu góor ba, tey ñaan ci Aji Sax ji naan: «Éy Aji Sax ji sama Yàlla, rikk bàyyil bakkanu xale bii, mu délsi ci moom!»

²² Aji Sax ji nangul Ilyaas kàddug ñaanam, bakkanu xale bu góor ba délsi ca moom, mu dund. ²³ Ilyaas fab xale ba, jële ko ca néeg ba ca kaw taax ma, wacce ko ca biir kër ga, jox ko ndeyam. Mu ne ko: «Xoolal, sa doom a ngi dund!»²⁴ Jigéen ja ne Ilyaas: «Léegi nag xam naa ne nitu Yàlla nga, te kàddug Aji Sax ji ngay waxe moos.»»

Ilyaas daje naak surgab Buur Akab

18 ¹ Ba ñu demee ba mu yàgg, kàddug Aji Sax ji dikkal Ilyaas, ca ñetteelu atu maral wa. Mu ne ko: «Demal jàkkaarlook Akab, ma daldi taw ci

kaw réew mi.» ² Ilyaas tegu ca yoon wa ngir jàkkaarloojeek Akab.

Booba xiif ba metti na ca Samari. ³ Ci biir loolu Akab woolu Abdiyas ma yor këram. Abdiyas doonoon ku ragal Aji Sax ji lool. ⁴ Ndax ba Yesabel jabari Akab di rey yonenti Aji Sax ji, Abdiyas a boole woon téeméeri yonent, làq léen ci ñaari xuntiy xeer, xunti mu nekk juróom fukk. Mu di léen fa may lekk ak naan.

⁵ Akab nag ne Abdiyas: «Duggal ci biir réew mi te seet ci bëti ndox yeek xur yépp. Jombul nu gis ñax, ba mana rawale bakkani fas yeek berkelle yi, ba du jar nu di léen jekkali.» ⁶ Ba loolu amee ñu séddoo réew ma, ba mu daj, Akab fii, Abdiyas fee. ⁷ Abdiyas di dem, Ilyaas ne pemm dajeek moom ca yoon wa. Abdiyas xàmmi ko, sujjóotal ko, dëpp jë ba fa suuf, ne ko: «Kii Ilyaas a, sama sang?» ⁸ Mu ne ko: «Man a kay! Demal boog wax sa sang Akab, ne ko Ilyaas a ngoog de!»

⁹ Abdiyas ne ko: «Ana lu ma def lu bon, sang bi, ba nga di ma booleek Akab, mu di ma rey?» ¹⁰ Giñ naa ci Aji Sax ji, sa Yàlla jiy dund, amul wenn xeet mbaa réew mu sama sang Akab yónneewul, di la seet. Te bu ñu nee nekkoo fa, mu giñloo waa réew maak xeet wa ne gisuñu la. ¹¹ Léegi nag nga naan ma: “Demal wax sa sang ne ko Ilyaas a ngoog.” ¹² Su ko defee su ma teqlikook yaw, xelum Aji Sax ji yóbbu la fu ma xamul, fekk ma dem wax ko Akab te du la gis. Kon da may rey! Moona sang bi, man de, damaa masa ragal Aji Sax ji ba may ndaw ba tey. ¹³ Moo sang bi! Xanaa waxuñu la li ma def, ba Yesabel di rey yonenti Aji Sax ji? Maa làq téeméeri yonenti Aji Sax ji ci ay xuntiy xeer, xunti mu nekk juróom fukk, di léen may lekk ak naan. ¹⁴ Léegi nga naa ma: “Demal wax sa sang ne ko Ilyaas a ngoog!” Mu di ma rey?» ¹⁵ Ilyaas ne ko: «Giñ naa ci Aji Sax jiy Boroom gàngoori xare yi, moom mi may jaamu, tey dinaa jàkkaarloojeek Akab moos.»

Ilyaas jàankoonte naak Akab

¹⁶ Abdiyas dem ca Akab, yegge ko ko. Akab dikk taseek Ilyaas. ¹⁷ Naka la Akab gis Ilyaas, ne ko: «Kii yaw a, di lëmbe Israyil nii?» ¹⁸ Ilyaas ne ko: «Du

maa lëmbe Israyil de. Yaw kay la, yaak sa kër baay, ndax yéena dëddu sanaaney Aji Sax ji, di topp tuur yi nuy wax °Baal. ¹⁹ Léegi nag wooteel, Israyil gépp daje, fekkisi ma ca tundu Karmel, ñu ànd ak ñeenti téeméeri yonenti Baal ak juróom fukk (450) ak ñeenti téeméeri nit (400) ñuy lekk njëlal Yesabel, te di yonenti °Asera, tuur ma.»

Ilyaas fenqoo naak waa kër Baal

²⁰ Ba loolu amee Akab yónnee ca waa Israyil gépp, woo yonent ya, ñu daje ca tundu Karmel. ²¹ Ilyaas dikk jàkkaarlook mbooloo ma mépp. Mu ne: «Yéen nag dungen dakkal seen ciñiñ-cañañ ji ngeen nekke, wet gu nekk ngeen féete fa? Su Aji Sax ji dee Yàlla, toppleen ko; su dee °Baal, ngeen topp ko.» Waaye mbooloo ma ne patt. ²² Ilyaas ne mbooloo ma: «Man de maa fi des ci yonenti Aji Sax ji, man donj, te yonenti Baal yi ñeenti téeméer lañook juróom fukk (450). ²³ Léegi nag, indil-leen nu ñaari yëkk. Bàyyileen yonenti Baal, ñu tànn wenn yëkk wi, def ko ay dog, teg ci kaw matt mi, bañ koo taal. Man it dinaa defar weneen yëkk wi, teg ci kaw matt mi, bañ koo taal. ²⁴ Su ko defee ngeen ñaan ci seeni tuur, man it ma ñaan ci Aji Sax ji. Su boobaa, Yàlla ju ci wuyoo sawara, kookoo di Yàlla.» Mbooloo ma mépp ne: «Waaw, baax na!»

²⁵ Ci kaw loolu Ilyaas wax yonenti Baal ya ne léen: «Tànnleen wenn yëkk te jëkka defar, ndax yéena gëna bare. Bu ngeen noppee, ñaan ci seeni tuur, waaye buleen taal.» ²⁶ Ñu jël yëkk wa mu léen jox, defar ko. Ñuy yuuxu, di woo Baal suba ba digg bëccëg, naan: «Baal, wuyu nu!» Waaye kenn àdduwul, kenn wuyuwul. Ña ngay ciñiñ-cañañi, di wër °sarxalukaay ba ñu defar. ²⁷ Digg bëccëg jot, Ilyaas di léen ñaawal, naan léen: «Yuuxuleen ca kaw, waay! Mooy Yàlla moos; jombul daa am lu muy xalaat, mbaa mu jàpp, mbaa mu tukki, mbaa xanaa muy nelaw, ñu war koo yee.»

²⁸ Noonu ñu gënatee yuuxu, di dagg seen yaram ak i saamar ak i xeej, ni ñu ko baaxoo, ba deret ja sang léen. ²⁹ Digg bëccëg weesu, ñu gëna ràkkaaju di °waxyu, ba saraxu ngoon jot. Waaye du lenn lu àddu mbaa lenn lu wuyu mbaa lu léen faale.

³⁰ Ba mu ko defee Ilyaas wax ak mbooloo ma mépp, ne léen: «Jegesileen fii!» Ñépp jegesi. Mu defaraat sarxalukaayu Aji Sax ja tasaaroo woon, ³¹ daldi jël fukki doj ak ñaar, mu tollook limu giiri doomi Yanqóoba. Yanqóoba la kàddug Aji Sax ja dikkaloon ne ko Israyil ay doon turam. ³² Ilyaas jël doj ya, defare ab sarxalukaay ngir Aji Sax ji, ba noppi gas kàmb gu mana def fanweeri liitar, kàmb ga wër sarxalukaay ba. ³³ Mu teg matt ma ba mu jekk, daggat yëkk wa, teg ca kaw. ³⁴ Mu ne léen: «Duyleen ñeenti njaqi ndox, tuur ci kaw yàpp week matt mi.» Ñu def ko. Mu ne: «Defaatleen!» Ñu defaat. Mu ne: «Defatileen, muy ñetti yoon!» Ñu def ko, ba muy ñetti yoon. ³⁵ Ndox ma wal, wër sarxalukaay ba, ba kàmb ga sax fees ak ndox.

³⁶ Ba saraxu ngoon jotee, yonent Yàlla Ilyaas jegesi, ñaan ne: «Aji Sax ji, yaw Yàllay Ibraayma ak Isaaxa ak Yanqóoba, xamleel bésub tey jii ne yaw yaa di Yàlla ci Israyil, ma di sab jaam bi def lii lépp ci sa ndigal. ³⁷ Nangul ma, Aji Sax ji, rikk nangul ma, ba mbooloo mii xam ne yaw Aji Sax ji yaa di Yàlla te yaay delloosi seen xol ci yaw.»

³⁸ Ba loolu amee sawaras Aji Sax ji ne milib boole xoyom yàpp waak matt maak doj yaak suuf sa, ba far manq ndox ma ca kàmb ga.

³⁹ Ba mbooloo mépp gisee loolu, dañu ne gurub, dëpp seen jë fa suuf, daldi ne: «Aji Sax jeey Yàlla! Aji Sax ji kay mooy Yàlla!» ⁴⁰ Ilyaas ne léen: «Jàppleen yonenti Baal yii. Bu kenn ci ñoom rëcc.» Ñu jàpp léen, Ilyaas yóbbu léen ba ca xuru Kison, rendi léen foofa.

⁴¹ Gannaaw loolu Ilyaas ne Akab: «Doxal lekki te naan, ndax taw bu réy a ngi riir di ñëw.» ⁴² Akab dem, lekk, daldi naan. Ilyaas moom yéegi ba ca kaw tundu Karmel, sukk, dëpp jëwam ca diggante bëti óomam. ⁴³ Mu ne surgaam: «Laggal séentuji wetu géej.» Surga ba séentuji, dikk, ne ko: «Dara newu fa.» Ilyaas ne ko mu dellu xool ba muy juróom ñaari yoon.

⁴⁴ Juróom ñaareelu yoon ba, surga ba ne: «Lee de niir la wu tuut, toll ni loxol nit, jóge géej.» Ilyaas ne ko: «Demal ne Akab, mu takk watiiram te dem, bala koo taw bee ub.» ⁴⁵ Nes tuut asamaan ñuul kukk ak i xàmbaar, ngelaw la jóg, taw ba sóob ak doole. Ci biir loolu Akab dawal watiiram, jëm Yisreel.

⁴⁶ Aji Sax ji nag dooleel Ilyaa. Mu takk ndigg la, daw jiitu Akab ba ca buntu Yisreel.

Ilyaa gedd na

19 ¹ Gannaaw gi Akab nettli Yesabel la Ilyaa def lépp ak na mu rendee saamar mboolem yonent ya. ² Yesabel yónnee Ilyaa ndaw, ne ko: «Yal na ma tuur yi teg mbugal mu gëna réy, ndegam nэгëni ëllэг jëluma sa bakkan, ni nga jële bakkani yonent yii.»

³ Ilyaa gis na mu deme, daldi daw, ngir rawale bakkanam. Mu dem ba Beerseba ca réewum Yuda, bàyyi fa surgaam. ⁴ Moom ci boppam mu topp màndiŋ ma lu tollook doxub benn bés, doora toog ci taatu benn gajj. Ma ngay ñaan dee, naan: «Doy na sèkk, Aji Sax ji, jëlal sama bakkan rekk, ndax man kat gënuma samay maam.»

⁵ Mu tëdd, ay nelaw jàpp ko ca taatu gajj ba. Yégul lu moy am malaaka mu ko laal, ne ko: «Jógal lekk!» ⁶ Ilyaa ne xiféet, yem ci mburu mu ñu lakke doj yu tàng, ak njaqub ndox. Mu lekk, daldi naan, ba noppi tëdda. ⁷ Malaakam Aji Sax ja dellu ñëw, laal ko, ne ko: «Jógal lekk, lu ko moy doo àttan yoon wi.» ⁸ Ilyaa jóg lekk, daldi naan, leqliku, ba dox ñeent fukki guddi ak ñeent fukki bëccэг, ba ca Oreb, tundu Yàlla wa. ⁹ Mu dugg foofa ca biir xunti ma, fanaan fa.

Aji Sax ji yónniwaat na Ilyaa

Ci biir loolu kàddug Aji Sax ji dikkal Ilyaa, ne ko: «Ana looy def fii, Ilyaa?» ¹⁰ Ilyaa ne: «Man kat damaa xéroona xér ci yaw Aji Sax jiy Boroom gàngoori xare yi. Waaw, °bànni Israyil dañoo fecci sa °kóllèreek ñoom; say °sarxalukaay, ñu màbb; say yonent, ñu jam saamar. Ma des man doŋŋ, ñuy wuta jël sama bakkan nii!» ¹¹ Aji Sax ji ne ko: «Génnal taxaw ci kaw tund wi, fi sama kanam, ndax kat man Aji Sax ji maa ngi waaja romb.» Noonu ngelaw lu réy te bare doole jiitu Aji Sax ji, xar tund ya, rajaxe doj ya, waaye Aji Sax ji nekkul ca ngelaw la. Ngelaw la dal, suuf sa yëngu, waaye Aji Sax ji nekkul ca

yëngu-yëngu suuf ba. ¹² Suuf sa dal, sawara dikk, waaye Aji Sax ja nekkul ca sawara wa. Sawara wa dal, ndéey lu suufe topp ca. ¹³ Ilyaas dégg ca, muuroo mbubbam, génn taxaw ca buntu xunti ma; déggul lu moy baat bu ko ne: «Ana looy def fii, Ilyaas?» ¹⁴ Mu ne: «Man kat damaa xéroona xér ci yaw Aji Sax jiy Boroom gàngoori xare yi. Waaw, bànni Israyil dañoo fecci sa kóllëreek ñoom; say sarxalukaay, ñu màbb; say yonent, ñu jam saamar. Ma des man doŋŋ, ñuy wuta jël sama bakkan nii!»

¹⁵ Aji Sax ji ne ko: «Dellul topp say tànk te jaare ci màndiŋ mi ba Damas. Boo àggee, nanga °diw Asayel, fale ko ko buuru Siri. ¹⁶ Yewu ma baayam di Nimsi it, diw ko, fal ko buuru Israyil; te Alyaasa, ma baayam di Safat, dëkk diiwaanu Abel Mewola, nanga ko diw, fal ko, muy yonent, wuutu la. ¹⁷ Su ko defee ku Asayel reyul ba nga raw, Yewu rey la; ku Yewu reyul ba nga raw, Alyaasa rey la. ¹⁸ Waaye dinaa déeg ci biir Israyil juróom ñaari junniy nit (7 000), di mboolem ñi sujjóotaluloon °Baal te seeni gémmin masu koo foon.»

Ilyaas am na bëkk-néeg

¹⁹ Ilyaas bàyyikoo fa, fekk Alyaasa doomu Safat, Alyaasa di gàbb ak ñaar fukki nag ak ñeent yu ko jiitu, ñu likke léen ñaar-ñaar, moom ci boppam mu jiital fukkeelu likke baak ñaar. Ilyaas dikk ba ca moom, sànni mbubbam ca kaw Alyaasa. ²⁰ Alyaasa bàyyikoo ca nagam ya, daw topp ca Ilyaas, ne ko: «Ngalla may ma, ma tàgguji sama ndey ak sama baay te topp la.» Ilyaas ne ko: «Doxal dellu; lu ma la def?»

²¹ Alyaasa bàyyi fa Ilyaas, dellu jël ñaari nag, rendi ko sarax, jël banti ràngaay ya, togge yàpp wa, jox ko mbooloo ma, ñu lekk, ba noppi Alyaasa topp ci gannaaw Ilyaas, di bëkk-néegam.

Siri song na Samari

20 ¹ Fekk na Ben Addàd Buuru Siri woo mbooloom xareem mépp, ñu daje, ànd ak fanweeri buur ak ñaar yu mu faral, ñook seeni fas ak seeni watiir. Ñu dem song Samari, gaw ko. ² Ci kaw loolu Ben Addàd yónni ay

ndaw ca biir dëkk ba ca Akab, buuru Israyil. ³ Ñu ne ko: «Ben Addàd dafa wax ne: “Sa xalis ak sa wurus, maay boroom. Say jabar it, ak ñi gëna dëgër ci say doom, maay boroom.”» ⁴ Buuru Israyil ne ko: «Loo wax rekk, Buur sang bi, maak lépp lu ma moom yaay boroom.» ⁵ Ndaw ya dikkaat ne ko: «Ben Addàd dafa wax ne: “Maa yónnee woon ci yaw, di sàkku nga jox ma sa xalis ak sa wurus ak say jabar ak say doom yu góor. ⁶ Waaye nэгëni өllөг sax dinaa yónni samay jawriñ ci yaw, ñu seet ci sa biir kër ak say kër jawriñ. Mboolem luy sa alal dinañu ci teg loxo, nangu ko, yóbbu.”»

⁷ Buuru Israyil nag woolu magi réew ma mépp, ne léen: «Boo yeboo ngeen xam ne waa jii kat fitna lay wut; gis ngeen mu yeble ci man, bégga nangu samay jabar ak sama doom yu góor ak sama xalis ak sama wurus, te bañaluma ko ci dara.» ⁸ Mag ñaak mbooloo ma mépp ne ko: «Bu ko déglu te bul nangu!» ⁹ Akab ne ndawi Ben Addàd ya: «Waxleen Buur, sama sang, ne ko: “Sa jaam ba nee mboolem la nga jëkkoona yónnee di ko sàkku dina ko def. Waaye lii nga mujja laaj moom, du ko def.”» Ndaw ya dem jottali tontam. ¹⁰ Ben Addàd dellu yeble ca moom ne ko: «Yal na ma tuur yi teg mbugal mu gëna tar, ndegam duma tas Samari, ba pëndu tabax du fi des buy fees loxoy mboolem ñi ma topp.»

¹¹ Buuru Israyil ne: «Waxleen ko ne ko:

“Jóge xare, di bàkku

moo gën jëm xare, di bàkku.”»

¹² Ba Ben Addàd di jot ca kàddu googu, ma ngay naan, mook buur ya far ak moom ca mbaar ya. Mu jox ay nitam ndigal ne léen: «Takkuleen!» Ñu takku, ngir songi dëkk ba. ¹³ Ndeke ci biir loolu ab yonent dem na ca Akab, buuru Israyil ne ko: «Aji Sax ji dafa wax ne: Gis nga mbooloom xare mii mépp ak li ñuy bare lépp, xamal ne teg naa léen ci sa loxo bésuub tey, ndax nga xam ne maay Aji Sax ji.» ¹⁴ Akab ne ko: «Ku may defal loolu?» Mu ne ko: «Aji Sax ji nee: Dag yi kilifay diiwaan yi yebal lay doon.» Akab ne ko: «Kuy sooke xare bi?» Mu ne ko: «Xanaa yaw.»

Israyil daan na Siri

¹⁵Noonu Akab lim dag ya kilifay diiwaan ya yebal, ñuy ñaar téeméer ak fanweer ak ñaar (232). Gannaaw loolu mu lim mbooloom Israyil gépp, ñuy juróom ñaari junni (7 000). ¹⁶Ñu génn digg bëccëg, fekk Ben Addàd a ngay màndi mook fanweeri buur ak ñaar ya mu faral, ca mbaar ya.

¹⁷Dag ya kilifay diiwaan ya yebal a nga jiitu. Ci biir loolu Ben Addàd yónnee, ñu wax ko ne ko: «Am na ñu jóge Samari, di ñëw.» ¹⁸Mu ne: «Su léen jàmm taxee jóg, jàppleen léen, ñuy dund; su léen xare taxee jóg it, jàppleen léen, ñuy dund.» ¹⁹Ba mu ko defee dagi kilifay diiwaan ya génne ca dëkk ba, mbooloom xare ma topp ca seen gannaaw. ²⁰Ku nekk jam noon ba nga janool, waa Siri daw, Israyil topp léen. Waaye Ben Addàd buuru Siri war fas, daw mook ay gawar. ²¹Buuru Israyil nag song léen, rey fas ya, yàq watiir ya, daan waa Siri jéll bu réy. ²²Yonent ba dikk ca buuru Israyil ne ko: «Nanga dëgërлуwaat te xam ni nga wara def, ndax nëgëni déwén buuru Siri dina la songaat.»

Siri songati na Israyil

²³Ba loolu amee kàngami buuru Siri digal buuru Siri ci wàllu Israyil, ne ko: «Ñii, seeni tuur tuuri tund lañu; moo tax ñu ëpp nu doole, waaye su nu xeexëek ñoom ci joor gi déy, su boobaa noo léen di ëpp doole. ²⁴Defal nii: follil buur yi ci sa gannaaw yépp, jële léen fa ñu jiite, teg fa jawriñ yu léen wuutu. ²⁵Te yaw nga sosaat mbooloom xare mu mel ni ma nga amoon, fas ak fas, watiir ak watiir, ndax nu mana xareek ñoom ci joor gi. Su boobaa déy, noo léen di ëpp doole.» Mu déggal léen, def noona.

²⁶Ca déwén sa Ben Addàd lim waa Siri, daldi dem Afeg ca xare baak Israyil. ²⁷Waa Israyil daje, sàkk ab dund, ba noppi dox wuti léen. Waa Israyil a nga dal janook ñoom, di saf ñaari gétti bëy. Waa Siri ñoom fees àll ba. ²⁸Góoru Yàlla ga dikk ne buuru Israyil: «Aji Sax ji dafa wax ne: Gannaaw waa Siri dañoo yaakaar ne man Aji Sax ji, yàllay tund laa waaye duma yàllay xur,

dinaa teg mbooloo mu réy mii mépp ci say loxo. Su ko defee dingeen xam ne maay Aji Sax ji.»

²⁹Noonu ñu nekk ca seeni dal, jàkkaarloo diiru juróom ñaari fan. Bésub juróom ñaareel ba xare ba jib, waa Israyil daane témeéri junniy xarekat (100 000) yu warul fas ca waa Siri ci benn bés bi; ³⁰ña ca des daw ba Afeg, ca biir dëkk ba, tata ja màbb ca kaw ñaar fukki junniy nit ak juróom ñaar (27 000) ca ñoom. Fekk na Ben Addàd daw dugg ca biir dëkk ba, jàll ci biir néeg bu làqoo làqu. ³¹Ay jawriñam ne ko: «Waaw, nun de dégg nanu ñu naa buuri Israyil buur yu baax lañu. Tee noo sol i saaku, tañlaayoo buum, toroxloo ko, te dem ca buuru Israyil? Jombul mu bàyyi la, nga dund.» ³²Ñu teraxlaayoo ay saaku, tañlaayoo ay buum, dem ca buuru Israyil, ne ko: «Ben Addàd sa jaam ba nee, nga baal ko ngalla te bàyyi ko mu dund.» Mu ne: «Ndeke mu ngi dund ba tey? Moom sama mbokk a!» ³³Ndaw ya am njort lu rafet nag. Ñu gaaw naa: «Ben Addàd kay sa mbokk a!» Mu ne léen ñu dem indi ko. Ba Ben Addàd dikkee ba ca moom, mu waral ko ca watiiram.

³⁴Ben Addàd ne Akab: «Dëkk yi sama baay nangoo woon ci sa baay dinaa la ko delloo, te boo yeboo sàkkal sa bopp ay bérabi njaay ca Damas, na sama baay def ca Samari.» Akab ne ko: «Man nag damay fasanteek yaw °kóllère ci loolu, bàyyi la nga dem.» Ba loolu amee mu fasanteek moom kóllère, bàyyi ko mu dem.

Ab yonent sikk na Akab

³⁵Ci biir loolu kenn ca kureelu yonent ya wax moroom ma ci ndigalal Aji Sax ji, ne ko: «Ayca, jam ma!» Waa ja lànk, ne du ko jam. ³⁶Mu ne ko: «Gannaaw nanguwuloo déggal Aji Sax ji, dama ne, booy teqlikook man, gaynde fàdd la.» Naka la teqlikook moom, gaynde dajeek moom, fàdd ko. ³⁷Waa ja gisaat keneen ca ñoom ne ko: «Ayca, jam ma!» Kooka jam ko bu baax, ba gaañ ko. ³⁸Yonent ba dem, taxaw ca yoon wa, soppi colam, fab kaala, takke bët ya, di xaar Buur. ³⁹Buur romb, mu woo ko, ne ko: «Man de sang bi, damaa gaañu ci digg xare, nit dikk, indil ma keneen, ne ma: “Xoolal

ma kii, su rëccee, sa bakkan ay fey bakkanam, mbaa nga feye ko ñetti junniy (3 000) dogi xaaalis.”⁴⁰ Waaye man damaa fekk ma jàpp wet gu nekk, waa ja nag rëcc.» Buuru Israyil ne ko: «Sab àttee ngoog, yaa ko waxal sa bopp.»⁴¹ Noonu yonent ba ne muret kaala ga mu takkoon ca bët ya; buuru Israyil xàmmi ko, xam ne ci yonent yi la.⁴² Mu ne ko: «Aji Sax ji dafa wax ne: Gannaaw yaa bàyyi ku ma aayaloon bakkanam, sa bakkan mooy fey bakkanam te say bokk ay fey bokkam.»⁴³ Ba loolu amee buuru Israyil mer, ne fóññ, daldi ñibbi këram, ca Samari.

Buur Akab tooñ na Nabet

21 ¹ Gannaaw ba loolu wéyee mu am lu xew, di mbirum toolu reseñu Nabet, waa ju dëkk Yisreel. Nabet daa amoon tool ca Yisreel, ca wetu kër Akab buuru Samari. ² Akab ne Nabet: «Jox ma sa toolu reseñ bi, ma def kob tóokër, ndax jege na sama kër. Dinaa la ko wecci toolu reseñ bu ko gën, walla su la gënalee ma delloo la njëgam ci xaaalis.» ³ Nabet tudd Aji Sax ji, ne Akab: «Yàlla tere ma di la jox sama suufas maam!»

⁴ Akab ñibbi këram, mer, ne fóññ ndax la ko Nabet waa Yisreel ba wax, ne ko du ko jox suufas maamam. Mu tëdd ca lalam, gedd, baña lekk. ⁵ Soxnaam Yesabel dikk ne ko: «Lu la tax ne fóññ nii? Lu la teree lekk?» ⁶ Akab ne ko: «Damaa wax ak Nabet waa Yisreel bi, ne ko mu jaay ma toolu reseñam, ma fey ko xaaalis mbaa su ko neexee ma wecci ko ko beneen toolu reseñ. Mu ne ma du ma jox toolu reseñam.»

⁷ Yesabel ne ko: «Xanaa du yaay buuru Israyil? Jógal lekk waay te bégal sa xol. Man maa lay jox toolu reseñu Nabet.» ⁸ Ci kaw loolu Yesabel bind ay bataaxal ci turu Akab, def ci màndarga torlub Akab. Mu yónnee bataaxal ya ca mag ñaak gor ña ca dëkkub Nabet. ⁹ Mu bind ca bataaxal ya ne: «Yéeneleen koor^w, beral Nabet jataay ci kanam mbooloo mi, ¹⁰ te teg ñaari nit ñu tekkiwul dara, ñu janook moom. Na ñooñu duural Nabet ne ko: “Saaga

^w **21.9 koor** googu dafa mel ni tuub ak toroxlu lañu ci jublu.

nga Yàlla, saaga Buur.” Su ko defee ngeen génne ko dëkk ba, dóor ko ay doj ba mu dee.»

¹¹ Ba mu ko defee waa dëkkub Nabot, mag ñaak gor ña daldi def la Yesabel santaane te bind ko ca bataaxal ya mu léen yónnee. ¹² Ñu yéene koor, beral Nabot jataay ca kanam mbooloo ma. ¹³ Ñaari nit ñu tekkiwul dara dikk toog janook moom. Ñu duural ko ca kanam mbooloo ma, ne Nabot daa saaga Yàlla, saaga Buur. Ñu génne Nabot dëkk ba, dóor ko ay doj ba mu dee. ¹⁴ Ñu yónnee nag ca Yesabel ne ko dóor nañu Nabot ay doj ba mu dee.

¹⁵ Yesabel dégg ca, ne Akab: «Jógal nanguji toolu reseñu Nabot waa Yisreel bi. Bañoon na la koo jaaye xaalis, waaye dundatul, dee na.» ¹⁶ Akab dégg ca, daldi jubal toolu reseñu Nabot waa Yisreel ba, nangu ko.

Aji Sax ji dogal na mbugalu Akab

¹⁷ Ci biir loolu kàddug Aji Sax ji dikkal Ilyaas ma dëkk Tisbi, ne ko: ¹⁸ «Demal taseek Akab, buuru Israyil ba ca Samari. Ma nga nee ca toolu reseñu Nabot ba mu nanguji. ¹⁹ Wax ko ne ko: “Aji Sax ji dafa wax ne: Du dangaa rey nit, ba nangu alalam?” Nga teg ca ne ko: “Aji Sax ji dafa wax ne: Fa xaj ya xabe deretu Nabot, ay xaj dina fa xabe sa deret, yaw itam.”»

²⁰ Akab ne Ilyaas: «Áa, noon bi, gisati nga ma?» Ilyaas ne ko: «Gis naa la, ndax dangaa dogu ci def lu bon lu Aji Sax ji ñaawlu. ²¹ Aji Sax ji nee na: Dama ne, dinaa wàcce lu bon ci sa kaw, fàllas say sët, ba faagaagal ci digg Israyil kuy taxaw, colol, te bokk ci yaw Akab, muy gor, di jaam. ²² Dinaa def sa kër mel ni kër Yerbowam doomu Nebat mbaa kër Basa doomu Axiya, ndax merloo nga ma te bàkkaarloo nga Israyil. ²³ Te itam Aji Sax ji wax na ci mbirum Yesabel ne: Ay xaj dina lekk Yesabel ca wetu tatay Yisreel.

²⁴ Ku Akab deele ci dëkk bi, xaj yi lekk;

ku ci médde àll, njanaaw ya for.»

²⁵ Akab dafa dogu woon ci def lu bon lu Aji Sax ji ñaawlu, ba amu ci moroom moos, te jabaram Yesabel di ko ci xabtal. ²⁶ Akab daan na def

ñaawteef ju réy, di topp ay kasaray tuur, di def mboolem lu doon baaxu Amoreen ña Aji Sax ji dàqoon ngir °bànni Israyil.

²⁷ Ba Akab déggee kàddu yooyu, daa xotti ay yéreem, di woor, sol i saaku, tēddaale ko, di temp ndànk, ngir toroxlu. ²⁸ Ci biir loolu kàddug Aji Sax ji dikkal Ilyaas waa Tisbi ba, ne ko: ²⁹ «Gis nga ni Akab toroxloo fi sama kanam? Gannaaw toroxlu na nii ci sama kanam, duma wàcce lu bon cig dundam. Ci jamonoy doomam ju góor laay wàcce lu bon ci waa këram.»

Akab songati na Siri

22 ¹ Gannaaw loolu toog nañu ñetti at yu xare amul diggante Siri ak Israyil.

² Ca ñetteelu at ma, Yosafat buuru Yuda dikk ca buuru Israyil. ³ Fekk buuru Israyil wax ak i jawriñam ne léen: «Xanaa xamuleen ne Ramot ga ca Galàdd noo ko moom? Te jéemunoo def dara, ba nangu ko ci loxol buuru Siri!» ⁴ Mu ne Yosafat: «Ndax doo ànd ak man ca xareb Ramot ga ca Galàdd?» Yosafat ne ko: «Maa ngi, yaa ngi, samay nit ay say nit, te samay fas ay say fas.» ⁵ Yosafat teg ca ne buuru Israyil: «Jëkkala seet lu ci Aji Sax jiy wax.»

⁶ Buuru Israyil nag woo yonent yi, ñu daje, xawa tollook ñeenti téeméer. Mu laaj léen ne léen: «Ndax ma dem xarejeek Ramot ca Galàdd, am ma bàyyi?» Ñu ne ko: «Demal Buur, ndax Boroom bi dina léen teg ci sa loxo.» ⁷ Yosafat dellu ne: «Ndax fii daa amatul yonentu Aji Sax ju ñu mana seetlu fa moom?»

⁸ Buuru Israyil ne Yosafat: «Am na ba tey genn góor gu ñu mana seetal ci Aji Sax ji. Waaye man maa ko bañ, ndax du °waxyu lu baax ci man, lu bon rekk; mooy Mise doomu Yimla.» Yosafat ne ko: «Buur, bul waxe noonu.» ⁹ Buuru Israyil daldi woo ab jawriñam ne ko: «Indil ma Mise doomu Yimla léegi.»

¹⁰ Buuru Israyil ak Yosafat buuru Yuda nag, ña nga bokk sol seeni mbubbi buur ca dàgga ja ca buntu Samari. Ku ci nekk toog ci sa ngàngune. Yonent yépp di waxyu fa seen kanam. ¹¹ Fekk na Sedekiya doomu Kenaana, ma woon ci seen biir, defarlu ay béjjéni weñ. Ma nga naan: «Aji Sax ji dafa wax ne: “Yii ngay jame waa Siri, ba jeexal léen.”» ¹² Mboolem yonent ya ca des di waxyu,

kàddu gi di genn. Ñu naan: «Buur, songal Ramot ca Galàdd te jël ndam li, ndax Aji Sax ji dina léen teg ci say loxo.»

Mise waxyu na jéllub Akab

¹³ Ci kaw loolu ndaw la woo woon Mise, wax Mise ne ko: «Ma ne, yonent ya, seen kàddu genn la, ndamal Buur lañuy °waxyu. Kon nag, na sa kàddu ànd ak seen kàddu di genn, te nga wax ci lu baax.» ¹⁴ Mise ne ko: «Giñ naa ci Aji Sax ji, kiy dund, li ma Aji Sax ji wax rekk laay wax.» ¹⁵ Ba Mise dikkee ba ca Buur, Buur ne ko: «Ndax nu songi xare Ramot ga ca Galàdd, am nu bàyyi?» Mu ne ko: «Waaw kay, Buur, song, daan rekk; Aji Sax ji dina léen teg ci say loxo!» ¹⁶ Waaye Buur ne ko: «Ñaata yoon laa lay waatloo ne la bu ma wax lu moy dëgg ci turu Aji Sax ji?» ¹⁷ Mise ne ko:

«Gis naa Israyil gépp tasaaroo ca tund ya,
mbete xar yu amul sàmm.

Aji Sax ji ne: “Ñii de amuñu sang.

Na ku nekk ci ñoom ñibbi këram ci jàmm.”»

¹⁸ Buuru Israyil ne Yosafat: «Waxuma la woon ne du waxyu ci man lu baax, xanaa lu bon rekk?» ¹⁹ Mise teg ca ne ko: «Kon nag déglul kàddug Aji Sax ji. Gis naa Aji Sax ji, mu toog ci ngànguneem, mboolem gàngooru asamaan a nga taxaw wër ko, ndijoor ak càmmoñ. ²⁰ Aji Sax ji ne: “Ana kuy nax Akab, mu songi Ramot ga ca Galàdd, ba daanu ca?” Kii ne nii, kee ne nee. ²¹ Xelum waxyu mu Yàlla ma jegesi, taxaw fa kanam Aji Sax ji. Mu ne: “Man maa koy nax.” Aji Sax ji laaj ko ne ko: “Nan?” ²² Mu ne: “Damay dem, doon xel muy safaan dëgg, daldi dikkal yonentam yépp.” Mu ne ko: “Nax ko kay, man nga ko. Demal def ko.” ²³ Looloo waral lii. Aji Sax ji dafa def xel muy safaan dëgg dikkal sa yonent yii yépp, te Aji Sax ji dogal na sa musiba.»

²⁴ Ba loolu amee Sedekiya doomu Kenaana daldi talaata Mise, ne ko: «Ana fu xelum waxyu mu Aji Sax ji jaare, ba jóge ci man di wax ak yaw?» ²⁵ Mise ne ko: «Dama ne dinga ko xam keroog ba ngay làquji néegoo néeg.» ²⁶ Buuru Israyil ne: «Jàppleen Mise, yóbbu ko ca Amon boroom dëkk bi, mook Yowas

doomu (/ndawal) Buur. ²⁷ Neleen ko: «Buur dafa wax ne: Tëjleen kii kaso, di ko jox lekk gu néew ak ndox mu néew, ba keroog may délseek jàmm.»»

²⁸ Mise ne: «Soo délseek jàmm déy, Aji Sax ji waxul, ma jottali.» Mu dellu ne: «Mbooloo mi, yéena ko déggandoo, yéen ñépp.»

Akab daanu na

²⁹ Ba mu ko defee buuru Israyil ànd ak Yosafat buuru Yuda, ñu songi Ramot ga ca Galàdd. ³⁰ Buuru Israyil nag ne Yosafat: «Damay soppo col, dugg ci xeex bi, waaye yaw solal sa mbubbam buur.» Noonu buuru Israyil soppo colam, dugg ca xeex ba. ³¹ Fekk na buuru Siri jox ndigal fanweeri nitam ak ñaar, ñay jiite watiiri xare ya. Mu ne léen: «Buleen xeex ak kenn, du ku tuut, du ku réy, diirleen buuru Israyil, moom rekk.» ³² Ba loolu amee, ña jiite watiiri xare ya gis Yosafat, daldi ne: «Kii kay buuru Israyil la!» Ñu walbatiku ci kawam, song ko. Waaye naka la Yosafat àddu ca kaw, ³³ njiiti watiir ya xam ne du buuru Israyil, ñu walbatikuwaat, bàyyi ko. ³⁴ Ci biir loolu mu am ku soqi fitt te diirul kenn, mu dal buuru Israyil ci diggante ñaari wàlli pakk bi mu sol. Mu ne kay dawal watiiram: «Wañnikul, génne ma ci xeex bi, gaañu naa!» ³⁵ Xare ba jolli bésub keroog, ba tax ñu téye buur ba, mu wéeru ca kaw watiiram, janook waa Siri, ba ca ngoon sa, mu doora dee. Jam-jam baa nga nàcc, ba taa ca biir watiir ba. ³⁶ Jant baa ngay xalambaayu, yéene jib, ba dajal mbooloo ma. Ña nga naan: «Na ku nekk ñibbi sa dëkk, ca sam réew!»

³⁷ Buur ba nag saay, ñu yóbbu ko Samari, denc ko foofa. ³⁸ Ba ñuy raxas watiir ba ca déeg ba ñuy wax Samari, xaj ya di xab deret ja, gànc ya di sangu ca ndoxum déeg ma, muy la Aji Sax ji waxoon.

³⁹ Li des ci mbiri Akab ak mboolem lu mu def ak kër ga mu tabax, rafetale ko bëñi ñay, ak mboolem dëkk ya mu tabax, loolu lépp, bindees na ko moos ca téere ba ñu dippee Jaloorey buuri Israyil ca seeni jant. ⁴⁰ Noonu Buur Akab saay, fekki ay maamam, doomam Akasiya falu buur, wuutu ko.

Yosafat falu na Yuda

⁴¹ Akab moomu, ba mu faloo Israyil, ba dugg ñeenteelu atu nguuram, ca la Yosafat doomu Asa falu buur, jiite Yuda. ⁴² Yosafat amoon na fanweeri at ak juróom, ba muy falu buur. Péeyoo na Yerusalem ñaar fukki at ak juróom. Yosafat, Asubaay ndeyam; Asuba, Sili mooy baayam. ⁴³ Yosafat aw na ci tànkí baayam Asa, jàddul fenn, xanaa di def njub lu Aji Sax ji rafetlu. ⁴⁴ Teewul jëlewu fa °béraabi màggalukaay ya. Nit ña dañu fa daa dem ba tey, di fa rendi saraxi jur, di fa taal cuuraay. ⁴⁵ Séqoon na nag ak buuru Israyil jàmm.

⁴⁶ Li des ci mbiri Yosafat ak njàmbaraam ak i xareem, bindees na lépp moos ca téere ba ñu dippee Jaloorey buuri Yuda ca seeni jant. ⁴⁷ La desoon ca ñay jaay seen bopp ca màggalukaayi tuur, ya fa desoon ca jamonoy baayam Asa, ba booba, Yosafat da léena jële ca réew ma.

⁴⁸ Booba réewum Edom amuloon buur. Ab jawriñ lañu fa daan tabb.

⁴⁹ Yosafat defaroon na ay gaal yu mag yu mu deme réewum Ofir, di wuti wurus. Waaye sottiwul, ndax gaal yaa nga suux ca Esiyon Geber. ⁵⁰ Booba la Akasiya doomu Akab wax Yosafat ne ko: «Tee ngaa may samay nit, ñu ànd ak say nit ci gaal yi?» Yosafat lànk.

⁵¹ Gannaaw gi Buur Yosafat saay, fekki ay maamam, ñu denc ko fa ñu rob ay maamam ca gox ba ñu naan Kër Daawuda maamam. Doomam Yoram falu buur, wuutu ko.

Akasiya falu na Israyil

⁵² Yosafat moomu, ba mu faloo Yuda, ba dugg fukkeelu atu nguuram ak juróom ñaar, ca la Akasiya doomu Akab falu buur ca Israyil, péeyoo Samari. Akasiya nguuru na Israyil ñaari at. ⁵³ Da daan def lu bon, lu Aji Sax ji ñaawlu, topp tànkí ndeyam ak baayam ak tànkí Yerbowam doomu Nebat, ma doon bàkkaarloo Israyil. ⁵⁴ Akasiya jaamu na °Baal, tuur ma, di ko sujjóotal, ba merloo Aji Sax ji, Yállay Israyil, muy mboolem la baayam daa def.

Leeral yi

Asera: Mooy tuuru Kanaaneen mu jigéen mi ñu gëmoon ne mooy giiral nit. Ñu di ko farala dendaleek tuur mi ñuy wax Baal. Ñu daan ko jaamu fu jége ab gott, walla fu ñu ko sampal ay xer.

Astàrt: Moo doon tuur mu jigéen mi gënoona màgg ci tuuri Kanaaneen ñi. Ñu yaakaaroon ne moo jagoo wàllu sèy, te mooy giiraal. Moo doon jabaru tuur mi ñuy wax Baal.

Baal: Moo doon tuur mi gëna màgg ci tuuri waa Filisti. Waa dëkk bu mag bu nekk amoon nañu seen tuur mu ñuy wax Baal, mu doon tuuru dëkk ba. Kon Baal yu baree amoon. Tur wi di firi «sang bi» mbaa «boroom bi,» ñu jàpp ne moo moom lépp lu ñu sàkk, di nangul jur geek tool yi. Diiney Baal daa laajoon ay nit ñuy jaay seen bopp fa ñuy jaamoo Baal, te loolu di lu Aji Sax ji sib lool.

bànni Israyil g-: Israyil mooy tur wa Yàlla jox Yanqóoba, doomu Isaaxa, di sètu Ibraayma. Ñi soqikoo ci Yanqóoba lañuy wooye bànni Israyil mbaa Yawut. Ñoo def fukki giir ak ñaar, di xeet yi soqikoo ci doomi Yanqóoba. Mboolem ci aaya yi ñuy dendale giiru Yuda gi ci bëj-saalumu réewum Israyil ak fukki giir yi ci bëj-gànnaru Israyil, saa yu ñu nee «Israyil» ci yooyu aaya, fukki giir yi rekk a tax ñuy wax. Giiru Simeyon ci giiru Yuda lañu ko boole, ndaxte giiru Simeyon seen céru suuf a ngi woon ci biir suufas giiru Yuda.

bérab bu sell b-: Kër Yàlla ga amoon na ñaari néeg. Néeg bu mag ba moo doon bérab bu sell ba. Sarxalkat yépp sañ nañu faa dugg. Néegu biir bi lañu doon tudde bérab bu sell baa sell. Sarxalkat bu mag ba doŋŋ moo sañoona dugg ca bérab bu sell baa sell, te benn yoon cim at lay doon. Yàllaa ngi jaare ci ni ñu taxawale këram geek li ci biir, di xamle ne, moom Yàlla ku sell la.

bérabi màggalukaay y-: Bérabi màggalukaay yi ay bérab yu nit ñi taamu woona màggale la, muy yéefar yi, di bànni Israyil. Lu ci ëpp ay bérab yu kawé la daan doon, waaye man na baña kawé itam. Su dee yéefar yi, ñu di ca jaamu seeni xërëm; su dee bànni Israyil ñoom, ñu di ca jaamu seen Yàlla Aji Sax ji. Gannaaw ba Suleymaan tabaxee ca Yerusalem kër Yàlla gu ñuy màggale Aji Sax ji, bérabi màggalukaay yooya ay tuurukaay rekk lañu mujj doon.

diw: Diw lañu daan fale sarxalkat yi ak buur yeek yonent yi. Diw gi ñuy fale, sarxalkat ya daan nañu léen laalal ci diwu pal gi, tabbe léen ko, ñu sasoo liggéey ba.

gaal g-: Gaal gi ñuy wax fii waxande la, wu ñu denc àlluwa, ya ñu bind yoonu Yàlla te yonent Yàlla Musaa jottali ko. Gaal googu doon misaal teewaayu Aji Sax ji ci biir màggalukaay bi ci digg mbooloom. Li waral ñu tudde ko gaal gi def àlluway kóllërey Yàlla (1.Buur ya 6.19; 8.21) mooy Yàlla daa joxoon Musaa àlluway xeer yooyu, bind ca yoon wa lal kóllëre ga mu fas ak ñoom. Bu gaal ga masaana teew bérab, loolu day firndeel ne Yàlla teewal na fa leeram ñeel mbooloom boppam.

gaalu Aji Sax j-: Seetal: **gaal g-**

gaalu kóllërey Aji Sax j-: Seetal: **gaal g-**

kóllëre g-: Kóllëre doon na dox diggante nit ak moroom ma, mu mel ni diggante Suleymaan ak Iram (1.Buur ya 5.26). Doxoon na ba tey diggante Yàllaak nit (2.Buur ya 11.17). Ci Mbind mu sell mi mboolem kóllëre yi Yàlla fasal nit ñu ngi aju ci kóllëreem ak Ibraayma mi mu digoon ne ko: « Te dinaa feddli sama kóllëre, gi ci sama diggante ak yaw, yaak sa askan, muy kóllëre guy sax maasoo maas ba fàww. Dinaa doon sa Yàlla, yaak sa askan.» (Njàlbéen ga 17.7; 2.Buur ya 13.23).

Leween b-: Ku cosaanoo ci Lewi lañuy wax ab Leween. Lewi kenn la woon ca ña sos bànni Israyil, di fukki doomi Yanqóoba yaak ñaar. Lewi mooy maamu Musaa ak Aaróona. Aaróona la Yàlla tànn muy sarxalkat bu mag ba. Ñenn ci ñi soqikoo ci moom ñoo daan donnante liggéeyu sarxale bi. Ña ca des ñoo léen daan jàpple ca liggéeyu kër Yàlla ga.

Lewi: Maam la ci Musaa.

néeg(u Yàlla) bu mag b-: Mooy néeg bu mag ba nekkoon ca biir tabaxu kër Yàlla ga. Néeg boobu, sarxalkat yi ak Leween ñi doŋŋ a fa sañoona dugg. Dees na ko wooye it bérab bu sell bi, mu wuuteek néegu biir bi, di bérab bu sell baa sell te sarxalkat bu mag ba doŋŋ sañ faa dugg benn yoon cim at.

Sarax y-: Sarax yi ñuy wax fii, Yàlla lañu koy jagleel. Bànni Israyil amoon nañu xeeti sarax yu bare: ay saraxi yéene ak ay saraxi sañul-bañ ak sarax su ñuy tuural Yàlla ak saraxu xalis ak saraxu pepp. Waaye li ci ëpp ay saraxi tuur deret la woon yu léen Yàlla tegoon, ngir seen njéggalu bàkkaar. Su ko defee ñu mana dëkke jokkook moom, Yàlla ju sell ji, ndax saraxu deret ja. Am na ci ay sarax, Yàlla da ciy xamal bànni Israyil ne peyug bàkkaar mooy dee, te deewu jur, gi ñuy sarxal, njot la ci boroom sarax bi. Bu loolu weesoo, deretu sarax dina fóot sobes bàkkaar itam, muy sobes suy topp nit mbaa lenn ci juntuwaayi màggalukaay ba.

sarax suy lakk ba jeex: Sarax la su kenn dul lekk dara. Dañu koy lakk muy saxar, ba jeex, jagleel lépp Yàlla.

saraxu cant ci biir jàmm: Sarax la su ñu daan sante Yàlla, ndax li mu léen di nangul, di léen barkeel te di léen jàmmal. Jur lay doon gu ñuy séddale ñetti cér. Benn bi, ñu lakkal ko Aji Sax ji ci sarxalukaay bi, ba mu jeex. Benn bi, sarxalkat yi féetewoo ko. Ñetteel bi, ki sarxe lekk, mook waa këram.

saraxu pepp m-: Peppam bele la mu ñuy jagleel Yàlla. Lenn li, ñu jaxase kook cuuraay ak diwu oliw, taal ko. Li ci des sarxalkat bee ko moom.

sarxalkat b-: Ab sarxalkat njiitu diine la bu sasoo di rendil jaamukat yi seeni sarax. Muy yéefar yi di bànni Israyil, ku ci nekk amoon na ay sarxalkatam yu leen di taxawal ca kanam ka ñu gëm, mu dim tuur su dee yéefar yi, mbaa muy Aji Sax ji, su dee bànni Israyil.

sarxalukaay b-: Jumtukaay la bu mel ni taabal, ñu di ca rendi ay sarax. Biir kër Yàlla ga nag ñaari sarxalukaay a fa nekkoon: benn bi ñuy lakke jur gu ñu rendi, ak bi ñuy taale cuuraayu sarax. Sarxalukaayu jur gi dafa mel ni waxande wu amul kubéer. Mu ànd ak ub caaxam, ñu di ca teg matt ma ñuy lakke jur ga.

serub y-: Baatu ebrë la. Ay malaaka lañu yu bokk ak Yàlla jataay. Ñooy wottu dénd ba ngànguney Yàlla nekk, ba foofa dëkke sell. Mànggalukaayu Yàlla ga amoon na gaal gu ñuy wooye gaalu kóllère ga. Ñaari serub yu ñu tégge wurus lañu tegoon ca kawam, ñu tiim ko, seeni laaf tàllalu, di saamandaay ngàngunem buur. Loolu di wone ne Yàlla Aji Sax jaa nga fa teew, na mu teewe ca kaw asamaan, serub ya yéew ko. Yàlla ci boppam nag kenn jëmmalu ko fa, na ñu jëmmale serub ya ñu tegg.

Siyonj: Mooy tund wa kër Yàlla ga nekk ca Yerusalem. Daan nañu ko tudde it dëkkub Yerusalem mbaa réewum Israyil.

waxyu: Wax lay doon, ju ab yonent di wax, ci ndigalal Yàlla. Leeleeg bu ci ab yonent tolloo, day mel ni ku daanu leer.

xaymab ndaje m-: Ba bànni Israyil nekkee ca màndiñ ma, moo doon seen mànggalukaay bu ñu mana wekki, yóbbu. Fa la Yàlla daan taseek Musaa te fa la Yàlla taamu woona wone ne mu ngi teew ci digg mbooloom mi mu goreel.

Fireekaay bi

barax b- Gàncax la guy sax ci wetu dex.

faagaagal Rey ay nit mbaa mala, ba ñu jeex tàkk. *Bu Tabaski jotee, xar yépp lañuy faagaagal.*

far Mooy jeexal tàkk.

fóññ /ne/ Ku mer lay doon, kanam ga lëndëm. Mooy **fuññ** ba tey. *Xale boo door mu ne fóññ.*

geño g- Ñu bokke ci geño, ñoo bokk baay mbaa maam ju góor.

giir Mooy barele ay doom ak i sët.

jëtun b- Ku jëkkëram faatu la. Mooy **jëtur** ba tey.

joor g- Suuf su wow, su amul ndox. Ndox du fa taa, day dem ca xur wa. *Waa Bawol ay joor-joor lañu. Amuñu dex, amuñu géej.*

kàngam b- Kilifa la ci dëkk.

kéméj g- Mooy cat li.

làng g- Ni ñu séddalee mbokk ci Israyil, amoon na fukki giir ak ñaar, giir gu ne ak i làngam, làng gu nekk ak i këram, kër gu nekk ak i njabootam.

Misra m- Mooy réew mi ñuy wax Esibtë tey.

móol Dinañu ko wax **muul** itam.

nebbon b- Gerees la.

ngàngune m-: Moo di toogub buur.

ors b- Xee tu pepp la.

pakk b- Jumtukaay la bu xarekat daan nàbb, di ko aare boppam. Jamonoy tey takk-der yi dinañu ko faral di nàbb bu ñuy jànkoon teek gàngoor.

parlu m- Àll la bu jur gi mana fore.

rëbb Mooy dëddu gu ànd ak móolu, di jur alkànde.

saamar b- Xee tu jaasi la, bu ñaari wetam ñaw.

xas /ne/ Bare lool. *Dëkk baa ngi ne xas ak i màngo.*

Fireekaay bi

xasab b- Mooy guddaayu loxo, diggante catu baaramu-digg ak conco.

xunti m- Doj la wu def pax, ba nit man cee dugg.

